

# **ابن موت**

**حكاياتُ الراحلين مبكرًا**

ابن موت  
حكايات الراحلين مبكراً  
مؤمن المحمدي  
تصميم الغلاف: أحمد فرج  
تدقيق لغوي: خالد رجب عواد  
رقم الإيداع: 2015 / 3062  
I.S.B.N: 978-977-488-364-4

---

دار اكتب للنشر والتوزيع



الإدارة: 10 ش عبد الهادي الطحان من ش الشيخ منصور،

المرج الغربية، القاهرة.

المدير العام: يحيى هاشم

هاتف: 01144552557 – 01147633268

E – mail: daroktab1@yahoo.com

Facebook: دار اكتب للنشر والتوزيع

---

الطبعة الأولى ، 2015م

جميع الحقوق محفوظة ©

دار اكتب للنشر والتوزيع

# ابن موت

## حكايات الراحلين مبكراً

---

مؤمن المحمدي



دار اكتب للنشر والتوزيع



ابن موت  
حكاياتُ الراحلين مبكرًا



## أبو الطيب المتنبي

### عيد بأي حال عُدَّتْ يا عيد

تقريبًا، يكاد يكون الواحد شايف المتنبي، وهو بيهرب من مصر، فسي عيد الضحية، ووقف شوية ياخذ نفسه، ويفكر، وترجع الأحداث فلاشباك:

طفل في الكوفة اسمه أحمد بن الحسين بن الحسن بن عبد الصمد، مشهود له بالكفاءة والعبقرية والنبوغ كشاعر، والشعر يعني وزارة الإعلام، أو وزارة الخارجية، لكنه "غير لائق اجتماعيًا"، ولذلك غير مسموح له الالتحاق بالبلاط عند أي حاكم أو أمير. حاجة كده زي عبد الحميد شتا الله يرحمه.

بس الولد ما انتحرش، وفضل يحاول، رغم التريقة والسخرية والشنكلة، رغم تسميته بـ "المتنبي" نتيجة إساءة فهم أشعاره، وكبر،

وانضم لتنظيم سياسي معارض اسمه "القرامطة"، وتعرض للاعتقال سنتين، وخرج، وحاول ثاني.

فضل المنتهي سنين طويلة، في معارك على كل المستويات، لحد ما بقي عنده 34 سنة، وأخيراً حد اعترف بيه، الحد ده اسمه سيف الدولة الحمداني، أمير حلب.

في بلاط سيف الدولة، المنتهي مكشش بس شاعر البلاط، كان حرفياً شريك في الحكم، وعاش 9 سنين هناك، خاضوا عشرات المعارك، ما خسروش ولا حرب. والعلاقة بينهم كانت مركبة لدرجة توحى بالكثير من الخيالات.

في الفترة دي، المنتهي حس إنه وصل للقمة، إيه ممكن يعيشه أكثر من اللي عاشه، المعنى ده قاله بكذا طريقة، أوضحها فالقصيدة اللي كتبها لما أم سيف الدولة ماتت، إنه خلاص شاف كل حاجة، واختبر كل حاجة، وما عادتش حاجة قمره.

بس اللعنة كانت موجودة طول الوقت، ودوام الحال من الحال، والحاكم العربي عبر التاريخ "وَدَّي"، والمنتهي حس إنه ما بقاش ع الحجر زي زمان، لدرجة إن واحد اسمه ابن خالويه (مستول النحو في بلاط سيف الدولة) ضرب أبو الطيب على دماغه فتحاله في حضور سيف الدولة، اللي ما فتحش بقه، ولا قال له حتى بستعمل إيه.



خرج المتنبي من بلاط سيف الدولة، بعد ما قاله قصيدة نارية مركبة، بتاعة "الخليل والليل والبيداء تعرفني" وسابه، بس المرة دي بقى مشهور، ومعاه فلوس كثير كثير. وبعد رحلة مش طويلة حط الرحال في مصر عند كافور الإخشيدي.

المتنبي كان متصور إنه، على ما اتعود، هيكون شريك في الحكم عند كافور، زي ما كان عند سيف الدولة، بس كافور كان باصص له كشاعر، أو كي، شاعر سوبر، مشهور، ما حصلش، لكنه في النهاية شاعر، يبجي ينتع القصيدة، وياخد اللي فيه النصيب، وبالنسبة لحالة المتنبي وقتها، "اللي فيه النصيب" ده يعني عزبة مثلاً.

المتنبي نفّض لكافور، وعاش في شوارع المحروسة، وبدأ يتكون عنده إحساس إنه كان غلطان لما تصور إنه عاش كل حاجة وشاف كل حاجة، تجربة مصر خلته يراجع كثير من تصوراته، ومتهيا لي قصيدة "الحمى" من أعظم قصائد الشعر العربي القديم، إن لم تكن الأعظم على الإطلاق.

في "الحمى" المتنبي بيحكى عن تجربته في مصر، وعن مصر نفسها، وعن الحياة كلها، وكانت نتيجة إصابته مرة بالحمى، وحالة من الضعف والوهن أصابته، فكان يمزج بين حالة الحمى، ومصر نفسها.

ففي الآخر، قرر المتنبّي إنه يهرب من مصر، إنه يسّيب كافور  
ورجالته، وفي طريق الهرب، وقف ياخذ نفّسه، ويسترجع حياته،  
ويكتب عن البلد اللّي الفساد فيها عمره ما بيخلص، الخير كثير  
والحرّامية كثير، لا الخير بيخلص، ولا الحرّامية بيشبعوا.

بس المتنبّي قرر إنه مش هيرجع لسيف الدولة، رغم حبه  
للراجل، ومش هيعيش تاني في بلاط أمير، أي أمير، ولما اكتشف إن  
اليوم اللّي بيهرب فيه ده هو يوم عيد الضحية، راح بادئ قصيدته  
بالبيت ده:

عيدّ بأي حالٍ عدت يا عيد

بما بمضى، أم، لأمر، فيك تجديد

ويدوب ثلاث سنين، وهيموت الموتة المشهورة، وهو يدوب  
حاجة وأربعين سنة، ربنا يرحمه ويرحم الجميع.

## أبو القاسم الشابي

### إذا الشعب

مع إنه مش مصري، بس أبو القاسم الشابي من أشهر الشعرا اللي عرفهم المصريين، وده كان بسبب بيت وحيد، البيت ده أيقونة من أيقونات الشعر الحماسي، وقصايد الثورة والتحرر الوطني، وهو البيت المعروف:

إذا الشعبُ يوماً أرادَ الحياةَ

فلا بُدَّ أن يستجيبَ القدر

الشابي شاعر تونسي، اتولد يوم الأربعاء 24 فبراير 1909، فترة بدري قوي قبل ما تتضح معالم الحركات الثقافية في العالم العربي، وفيه شبه بين بدايات حياته، وبدايات صلاح جاهين: الأب قاضي، سيلف البلد كلها من مديرية لمديرية، فالابن بيطلع مؤسس من الناحيتين، الناحية الفكرية من خلال مهنة أبوه اللي "كانت"

بستلزم معرفة كبيرة بالمعارف التراثية والمعارف المعاصرة. والناحية الثانية الحياتية يعني خبرات كثير وبيئات متنوعة.

نعلم الشابي في جامع الزيتونة. والزيتونة شبه الجامع الأزهر، أو الجامع الأزهر هو اللي شبهه، لأنه أقدم، اتبنى في النص الثاني من القرن الأول الهجري، أول ما المسلمين دخلوا شمال أفريقيا، ومع الوقت بدأ يبقى ستر مهم للثقافة الإسلامية في المنطقة دي.

في العصر الحديث، القرن التاسع والعشرين، الزيتونة بقى مركز مهم لمقاومة ثقافة الاحتلال الفرنسي في المنطقة، وللحفاظ على التراث العربي والإسلامي، ولك أن تتخيل جو زي ده ممكن يكون الشعر اللي بيهتم بيه عامل إزاي.

كان طبيعي إن الشابي يبقى مش حابب الدراسة والجو ده، مع إنه خد الشهادة اللي بيسموها "التطويع"، بس كان دايماً ضد الأصولية وبيحاول يجدد في الموضوع وفي الفكرة، علشان كده ما صدق خالص دراسة هناك، وراح دخل كلية الحقوق، وده تشابه تاني بينه وبين جاهين، الفرق إنه دخلها بمزاجه، بس جاهين دخلها بناء على رغبة أبوه.

في حقيقة، التعليم سمة مشتركة بين كل المثقفين العرب اللي شالوا على كتافهم مهمة إنهم يدخلونا القرن العشرين، ولو متأخرين

شوية. بس إحنا بـنتكلم عن التعليم التعليم، مش الحشو اللي إحنا بـندرسه.

المهم، إن أبو القاسم الشابي تجوز وهو طالب في الحقوق، ودي كانت بداية النهاية بالنسبة ليه، لأنه كان مريض بالقلب من بداية حياته، وبالتالي الدكاترة حذروه من حاجات كتير أهمها الشعر والجنس، وده طبعا ما حصلش، الشعر إدمان، والجواز كان ضرورة اجتماعية للحفاظ على النسل.

البيت اللي دخل بيه الشابي التاريخ كان مدخل قصيدة وطنية، ومكنش ينفع إنه ما ييقاش في النشيد الوطني لتونس، علشان كده، ورغم إن النشيد تأليف شاعر مصري هو مصطفى صادق الرافعي اللي كتب النشيد الوطني لمصر: "اسلمي يا مصر إنني الفدا"، فالتوانسة حطوا فيه بيت الشابي والبيت اللي بعده، ودخلوا ضمن النشيد "حماة الحمى" اللي بنسمعه في المناسبات خصوصا في مباريات كرة القدم.

غير كده مش هتلاقي حاجة معروفة يمكن غير قصيدة اسمها "عذبة أنت"، وسبب شهرتها فاروق شوشة، شوشة كان متعهد الشعر في الإذاعة والتلفزيون، وكان بيقدم برنامج شهير اسمه لغتنا الجميلة، عمل له شعبية بين الجمهور، فراح مطلع كتاب اسمه "أجمل عشرين قصيدة حب" كان منهم قصيدة الشابي.

بعد كذه: خدها محمد عبده، المطرب، وغناها، بس ما خدتش  
شهرة زي أغاني محمد عبده الثانية، على الأقل فمصر.

سنة 1929، بيموت أبو شاعرنا، الشيخ محمد الشاي، وده زود  
الحمل على أبو القاسم، اللي هو تعبان خلقة، وبدأ المرض يزيد عليه،  
ويوم الخميس 9 أكتوبر 1935 مات في المستشفى، وهو يدوب 25  
سنة، بس كانوا كفاية اسمه يدخل التاريخ ونفتكره في كل المناسبات  
الحماسية، ربنا يرحمه، ويرحم الجميع.

## أحمد سالم

### هنا القاهرة .. هنا المغامرة

عارف حضرتك نداء "هنا القاهرة" اللي بنسمعه في الراديو من يوم ما وعينا ع الدنيا؟ أهو أول واحد قال "هنا القاهرة" كان أحمد سالم، المذيع والممثل والمهندس والطيار والمنتج وشوية حاجات تانية.

بالنسبة لي، الراجل ده مش طبيعي، فيه حاجة مش مضبوطة خلته عبقرى، بس ودته في داهية. وهو عنده 21 سنة رجع من لندن سايق طائرة، طائرة خاصة اشتراها بعد ما درس هندسة وتعلم طيران هناك، الكلام كان سنة 1931، يعني هو مولود 1910، بالظبط الأحد 10 فبراير.

أول ما رجع الأوساط استقبلته استقبال الفاتحين، شاب وسيم غني ذكي مغامر يعرف يلبس متكلم لبق، مثقف، م الآخر ما يتسابش،

وده اللي خلاه اتعين بسرعة في شركة عبود باشا، فيزهق، فيعينوه في الإذاعة رئيس القسم العربي، فيزهق، بس قبل ما يزهق حصل الافتتاح الرسمي للإذاعة الخميس 31 مايو 1934، وقال هو بصوته: هنا القاهرة.

اللي عرف يلم أحمد سالم هو طلعت حرب، أسند له مهمة تأسيس ستوديو مصر وعينه جنبه في ثلاث أربع مناصب، زي مدير في "بنك مصر" وحاجات زي كده، وكان عمره وصل 26 سنة، تخيل اللي أسس ستوديو مصر كان عنده 26 سنة، دلوقتي ستة وعشرين سنة دي ممكن يكون لسه ما اتخرجش.

تم أحمد سالم مشروع ستوديو مصر، والمشروع مشي فلة شعبة منورة، وقدر ينفذ أول فيلم هو "وداد" بطولة الأنسة أم كلثوم، والفيلم كسر الدنيا، استفاد من الست وأفادها، والفيلم جر أفلام كتير، لحد ما وصلنا سنة 1938، لما ستوديو مصر أنتج فيلم: "لاشين".

الفيلم ده عمل ضجة التين وقتها، قصة تقليدية، ملك ظالم شعبه بيثور عليه، اقرست فـ 300 فيلم ومسلسل عربي، يمكن ده أولهم. بس إنتاجيا الفيلم ده كان طفرة، عشر تلاف ممثل وممثلة، أحمد رامي يكتب الحوار، إخراج مخرج أجنبي، "فريتز كرامب"، مجاميع وديكورات وملابس وهلمه.



الملك ما عجبوش الموضوع، دب خلاف، طيب، نعمل إيه؟ قالك  
غيروا النهاية، بحيث يطلع الملك مكنش واخد باله، ولما ياخذ باله ينقذ  
الموقف (وده اللي عمله بعد كده أنور وجدي في "أمير الانتقام"،  
ويمكن يكون ده الأساس لفكرة إن الزعيم كويس بس الحاشية  
بطالة)

اعترض سالم، وقال لهم محدش يقرب من القيلم، بس طبعا الفلوس  
بستكلم، فاستقال، مش بس من ستوديو مصر، لأ، من كل المناصب  
في مؤسسات طلعت باشا حرب، وطبعا عمل شركته الخاصة وأنتج  
أفلام، ومثل، ويمكن كلنا نفتكر الماضي المجهول مع ليلي مراد، بس  
أعتقد لو سألناه هيقول إنه بيحب أكثر أجنحة الصحراء، اللي  
بينتهي إن البطل يسب الدنيا كلها ويسب حبيبته، ويعيش طائر  
فالجو.

أكيد واحد زي ده اتجوز كثير، ودخل في علاقات نسائية، وكان  
ليه قصة مع أسمهان هي اللي جابت أجله، لأنه اتخانق مع ظابط شرطة  
بسببها، لما رجعت متأخرة في مرة فللقته ماسك لها مسدس، طلبت  
الشرطة، جه ظابط، اتخانق سالم معاه، وخذ طلقة في صدره، بس  
اتعالج وقتها، وكما كام سنة.

في الكام سنة دول كان عرف ليليان ليفي كوهين، اللي بقت  
الفنانة كاميليا، وهتلاقي حكايتهم مع بعض في الكتاب ده لما نتكلم

عن كاميليا، وفضل جرح الرصاصة معلم فيه لحد ما مات وهو  
بـيعمل عملية جراحية وهو عنده 39 سنة، يعني سنة 1949، تحديدًا  
السبت 10 سبتمبر، ربنا يرحمه ويرحم الجميع.

## إسماعيل أدهم

لماذا أنا ملحد؟

عرفنا اسمه في التسعينات، لما بدأ صوت كده يظهر بشويش إن عهد الملكية كان أحسن من عهد جمهورية يوليو، وكان من الأدلة اللي بتقال إن مصر كانت مداينة إنجلترا، والجنه المصري أغلى من الجنه الذهب، وإنه كان فيه تسامح ديني لدرجة إن سلامة موسى كتب كتاب، اسمه "لماذا أنا ملحد" ومحدث كلمه.

بعد شوية، بدأ التصحيح، لماذا أنا ملحد مش بتاع سلامة موسى، ده لكاتب شاب اسمه "إسماعيل أدهم" ومع البحث والتنقيب قام بيها دايرة صغيرة من المهتمين، كان على رأسهم المرحوم خالد السرجاني، بدأت ملامح حياة إسماعيل أدهم تبان، وكانت أكبر المفاجآت فيها إنه مات قبل ما يكمل الـ 30 سنة.

أدهم مواليد حي الجمرك في إسكندرية، الجمعة 13 يناير 1911، أبوه مصري، وأمه مسيحية ألمانية وإخواته البنات الأكبر

اتربوا كمسيحيين. بس أمه اتوفت وهو عنده سنتين، فهو اتربي كمسلم مع حد من قريبه خده لحفظ القرآن، وأتمه وهو طفل.

سافر تركيا واتعلم هناك، وبعدين طلع على روسيا وعمل الدكتوراه وهو عنده عشرين سنة، ورجع تركيا تاني يدرس في جامعاتها، وفي الآخر رجع مصر تاني، واتربي في قلب الحرب العالمية الأولى وآثارها الممتدة، وهو اتكلم كتير عن أثرها عليه، ويقال والله أعلم إنه كان ميال لألمانيا النازية.

طول الوقت كان أدهم ملحد واضح في الموضوع ده، ولما راح موسكو ودرس الفيزيا والرياضيات الموضوع خد صبغة شوية علمية، وفي تركيا أسس جماعة لنشر الإلحاد في بلاد العثمانيين! وفي مصر كان له نشاطات، أهمها الكتاب اللي كان سبب معرفتنا بيه.

الكتاب نفسه صغير جدا (كتيب في الحقيقة) ومفيهوش حاجة مميزة، وفيه شرح فيزيائي ورياضي مش مناقشة في الدين ولا عنه، وفي الآخر بيختمه بإنه مطمئن لإلحاده مستقر النفس زي ما المؤمن مطمئن بإيمانه.

لحد هنا الأمور عادية، لولا إن إسماعيل أدهم ده، لقوه متوفي وهو عنده 29 سنة، تحديدًا يوم 23 يوليو 1940 أثناء الحرب العالمية الثانية، لقوه غرقان، والبحر رامي جسته، ولقوا في جيبه رسالة يقول فيها إنه انتحر، وببوصي بتشريح مخه وحاجات من دي.

طبعًا الموضوع ده سبب بهجة كبيرة للمتدينين، والمناهضين للإلحاد، اللي بيعيشوا حياتهم بينوا خطرته على الأمة، وممكن تلاقي عشرات المقالات اللي بستقولك: بص، آدي آخره الإلحاد! يا عم، دول شوية مرضى نفسيين، إلخ إلخ.

لكن فيه ناس قليلة اهتمت بالموضوع من زاوية ثانية، وهي إنه غريب جدًا واحد يغرق ويلاقوا في جيبه رسالة، والكلام فيها واضح، وغريبة إن واحد مكتتب مريض لدرجة الانتحار يوصي بـ تشريح جثته لخدمة العلم، خصوصًا إن إعلان إسماعيل لعقيدته غطى على كونه في النهاية عالم، وحاصل على الدكتوراه، في مجال كان حساس جدًا وقتها، كفاية نعرف إنه بعد سنين قليلة من وفاته هي يظهر الاختراع الأشرس والأخطر، القنبلة الذرية.

اللي برجحوا فكرة قتله مش انتحاره، بيقولوا إن ليه أخ اسمه إبراهيم أدلى بأقوال قال فيه: إن أوراق أخوه، اللي كان فيه معادلات رياضية مهمة اختفت، وبشيروا كمان إلى شيوع جرائم القتل من قبل المخبرات، بحيث يبدو الأمر وكأنه انتحار.

طبعًا، الرأي الثاني ده لا يخلو من التفكير بمنطق نظرية المؤامرة، وده يخليك تقول: إن مفيش حاجة مؤكدة بخصوص وفاة الراحل اللي كان من القليلين جدا اللي أعلنوا إلحادهم في مجتمعات إسلامية، وبرضه، ربنا يرحمه ويرحم الجميع.

## إسماعيل الحبروك

كل شيء راح وانقضى .. بسرعة

الراجل ده مش بس مات بدري من حيث العمر (36 سنة وشهرين)، لكن كمان مات بدري في الزمن (1961) قبل ما يبقى فيه شوية اهتمام بالمؤلفين والملحنين وهكذا. ولولا كده مكنش أبدا هيقول في التقدير عن نجوم التأليف وقتها من أول حسين السيد لحد أصغر واحد (من غير أسماء).

ولو بصينا على قائمة أعمال الحبروك، اللي اتولد في دمنهور سنة 1925، تحديدًا يوم الاثنين 5 يناير، هنتخض من كتر الأغاني المشهورة والمميزة: يا أغلى اسم في الوجود، يا جمال يا حبيب الملايين، تخونوه، كل شيء راح وانقضى لسنجاة، يا فايتني فحيرة لكارم محمود، وكده يعني.

ومع حياته القصيرة، عمل كل حاجة تقريبا، كان طالب في حقوق الإسكندرية، ومن سنة أولى بدأ يرأسل روز اليوسف، فتتشر له شعر وقصة ومقالات وخلافه. وكان مالي الدنيا في الكلية، وزعيم طلابي، وقائد مظاهرات، وفيها حب بنت من كلية علوم، واتجوزها وخلف منها ولاده منهم حسين الحبروك الصحفي في الأهرام.

أول ما خلص كلية نزل على روز اليوسف، عينوه، وكتب فيها وفي غيرها، وله مقالات شديدة التقديمية والاستنارة خصوصا في ملف المرأة والمساواة مع الرجل. ويدوب حط رجله في روزا، طلع ع الإذاعة، كان فهمي عمر (زميله في الكلية) اشتغل فيها، ويعمل حاجة اسمها مجلة الهواء، قدمه فيها، فاعتمدوه مؤلف، وأغانيه للإذاعة وصلت حوالي 80 أغنية.

واللافت إنه اترقى في عالم الصحافة سريع سريع، اتعين في روزا وبعدين في الأهرام، ثم رئيس تحرير جرنان الشعب، وأخيرا رئيس تحرير الجمهورية حنة واحدة. وفي السينما عمل أغاني في 8 أفلام، وكتب سيناريو وحوار لفيلم اسمه ليالي الحب، وخدوا منه قصتين حولوهم لأعمال درامية بعد وفاته.

لما عمل يا أغلى اسم في الوجود، وغنتها نجاح سلام، عبد الناصر عجبته الغنوة. فراح مدي نجاح سلام الجنسية المصرية، وادى

إسماعيل جائزة الدولة التشجيعية، وكان لسه عنده 31 سنة، فطبعاً ده خلى مطربين كثير يحبوا يغنوا أعماله.

النقلة في عالم الأغاني، لما كتب غنوة "تخونوه" وأداها لبليغ حمدي يلحنها، علشان تغنيها ليلي مراد، فسمعها حلیم، طلبها من بليغ، بليغ رفض، وحصلت في الأمور أمور، وفي الآخر بليغ اتفاجئ إن ليلي مراد بـ تقول له إنما مش هتغني الغنوة، اديها لعبد الحلیم، وفيه أساطير اتقالت مش موضوعنا دلوقتي، بس واضح إن شاعرنا أمه قالتله: روح يا ابني، يجعل لك فكل خطوة نقلة.

على مستوى تاني، إسماعيل الحبروك واخذ عدد من الجوايز غريب إن شخص واحد ياخذها، من كتر ما هي متنوعة: أحسن أغنية، أحسن مقال، جائزة القصة من إذاعة لندن، جائزة النجمة الذهبية من المغرب، ده غير جائزة الدولة التشجيعية اللي اتكلمنا عنها من شوية.

سنة 1960، عز الدين ذو الفقار كان بيعمل فيلم "الشموع السوداء"، ولما نقول عز الدين ذو الفقار، فإحنا بتتكلم عن إن كل واحد اشترك فالفيلم كان من الصف الأول فمجاله، ذو الفقار اختار ثلاث أغاني لعبد الوهاب والموجي وبليغ، وغنوة بليغ كانت من كلمات الحبروك، وبقت من علامات الغنوة المصرية: "وحياة اللي فات"، ومطلعها: كل شيء راح وانقضى، وكانت آخر



حاجة يعملها قبل ما يتوفى يوم الخميس 16 مارس 1961، قبل ما يكمل 37 سنة، وفات وراه تاريخ كبير في عمر قصير، ربنا يرحمه ويرحم الجميع.

## ثلاثة أسمهان

من العبث الكلام عن أسمهان في 500 كلمة، بس اللي يهمنى هنا إن الست اللي ملت الدنيا وشغلت الناس، الست اللي سابت قصص يتحكي فيها عقود، وأغنيات تتسمع قرون، الست اللي ظهر اسمها في تاريخ الفن والسياسة ودنيا الأمراء وعالم الجاسوسية، الست دي ماتت وهي عندها 32 سنة فقط لا غير.

هي طبعا ما اسمهاش "أسمهان"، اسمها آمال الأطرش، دي معروفة، بس اللي إداها اسم أسمهان هو الملحن داوود حسني، وإداها الاسم ده مش بس علشان هو اسم فني، لكن كمان علشان ده اسم مطربة كان بيدربها ع الغنا، واتوفت وهي صغيرة.

حياة أسمهان طول الوقت كانت صاخبة، وفيها مطاردات وغرام وانتقام وحب وخيانة، اشتغلت في الغنا بدري، واعتزلت بدري، واتجوزت بدري، وخلقت بدري، ورجعت تاني تغني وتمثل.

لما بدأت تدخل عالم التمثيل بفيلم انتصار الشباب سنة 1941، كان ليها غريمتين: واحدة فنية وواحدة عاطفية، والأتين كانوا ملكات، واحدة ملكة للفن هي أم كلثوم، اللي كانت تقريباً تغلبت على كل منافسيها من أول منيرة المهديا لحد أي حد تتخيله، وما فضلش حد يناوشها على العرش غير صاحبة الصوت الجبلي المتمرد أسمهان.

الغريمة الثانية كانت ملكة بحق وحقيق: الملكة نازلي أم الملك فاروق، وأرملة الملك فؤاد. بعد موت فؤاد مباشرة، نازلي دخلت في علاقة مع أحمد حسنين باشا، فيه اللي بيقولوا التجوزوا، وفيه اللي بيقولوا لأ، بس المؤكد أنه كان فيه علاقة، وكانت نازلي بتغير عليه.

حسنيين صاحب أسمهان على نازلي، والحكاية اتعرفت، لدرجة إن نازلي كانت بتأخذ مسدس تروح تدور عليهم في البيوت اللي ممكن يكونوا بيترددوا عليها.

تفاصيل الحكاية دي حكيها في أكثر من سياق، لأنها متقاطعة مع حاجات كتير، لكن خلينا هنا فتم يان أسمهان دخلت تعمل فيلم غرام وانتقام، سنة 1944 مع يوسف وهي، وهي معادية طوب الأرض مش بس نازلي وأم كلثوم، عندك كمان الإنجليز مثلاً.

علاقة أسمهان بالمخابرات البريطانية مش سر، ولا حاجة تدخل في نطاق الإشاعة، أهلها أنفسهم أكدوا ده بأكثر من طريقة. هي اشتغلت معاهم، وصلحت لهم كتير من الأوضاع في جبال الدروز، وهم رجعوها لجوزها الأمير حسن، وإدوها فلوس كتير. بس دخول حمام المخابرات مش زي خروجه.

هي كانت عايزة تملص من الليلة دي، وهم كانوا عايزين يدوها مهام جديدة، وبعد ما كانت بتشتغل لحساب بريطانيا وفرنسا مع بعض، فرنسا بقت عايزاها تشتغل لحسابها ضد بريطانيا، وعكة كده مش ظريفة، وانتهى الأمر إنهم منعوا عنها الفلوس، والأمير حسن طلقها، ورجعت تاني تدور على مصدر دخل.

أثناء تصوير غرام وانتقام، استأذنت أسمهان في أجازة، يوم الجمعة 14 يوليو 1944، تروح فيها راس البر، مصيف الباشوات وقتها، وراحت بس ما رجعتش لأن العربية اللي مسافرة فيها غرقت، والسواق هرب، وكل اللي عادقهم أسمهان وعادوها، كلهم، طاهم الاتهام بأنهم قتلوها.

الفيلم كان اتصور أغلبه، بس فاضل فيه كام مشهد، فاتصرفوا وجابوا بنت اسمها جيهان، صوتها شبه أسمهان، أو على الأدق شبه صوت آمال اللي صوتها شبه صوت أسمهان بتاعة داود حسني.

بس واضح إن الصوت ده لعنة، لأنه يدوب البنت اللي كان عندها 19 سنة، عملت المشهد ده، وعملت أوبريت في الإذاعة اسمه "عذراء الربيع" ماتت على طول قبل ما تكمل عشرين سنة، بس ما ورثتش صوتها لحد، وده اللي يتقال عليه فعلًا فعلًا: ربنا يرحم الجميع.

## أمل دنقل

الله .. الوطن .. لا تصالح

ففي التسعينات، كان فيه شكوى بين المثقفين من تفشي الجهل بين المعلمين، وضحالة الأعمال الفنية والأدبية المنتشرة، وتجاهل المبدعين الحقيقيين، وكان فيه موقف كل الناس بتحكيه على إنه حصل معاها. كان المثقف يقول لك: تخيل إني بأسأل واحد عن أمل دنقل، فقال لي: أيوة سمعت عنها، مش دي كاتبة عراقية؟ مش متأكد إذا كان كل الناس عندهم أصحاب بالشكل ده، بس الموقف ده حصل معايا فعلاً.

بس أمل دنقل ما بقاش مجهول كده، وبقاله قاعدة من الحنين عريضة، والكلام ده بدأ مع الحراك السياسي في مصر، واستدعاء قصائد الرفض والمقاومة والكفاح، وأمل له باع عريض في انجال ده من أول "كلمات سبازتاكوس الأخيرة"، لحد "لا تصالح" مروراً بـ

"زرقاء اليمامة" وعشرات القصائد الثانية. لكن أمل بصراحة أكبر بكثير من الدور ده.

وأمل من الناس اللي مش بيشفع الكلام عنهم ف المساحات الصغيرة، لأن فيه كتير يتقال، بس لأننا هنا مهمتنا نفتح بس الكلام، نقول: إن أمل من المجموعة اللي جات من الصعيد في الستينيات، مع الأبنودي ويحيى الطاهر عبد الله وغيرهم، جم بسحلم غزو المدينة وتغيير العالم، واتصدمو صدمة الريفي في شوارع المدينة.

عاش أمل حياة صعبة كتير، خصوصاً من ناحية الشغل والمعاش، بس دي كانت حاجة تدعو للفخر زمان، مش موضوع مشين خالص، وكان شخص جاف حاد الطباع، هو اتولد سنة 1940، ومات يوم السبت 21 مايو 1983، يعني كل اللي عاشه 43 سنة، قضى منهم 39 سنة صعلوك، وأول ما فرح جاله السرطان، وعاش معاه أربع سنين، واتوفى.

بوابة التعارف مع أمل قصايد الحماسية، أولها 1963، اللي هي "كلمات سبارتاكوس الأخيرة"، واللي كتير من الناس نصحوه وقتها إنه ما يقولهش، لأنها مباشرة جداً وواضحة، كلمات رفض ضد الديكتاتور، وكمكان فيها استلهام لقصة الخلق بصيغتها الدينية، وتمجيد للشيطان.

بعد كده، كانت قصيدة "البكاء بين يدي زرقاء اليمامة" بعد النكسة مباشرة، ثم "تعليق على ما حدث في مخيم الوحدات"، ودي بالذات تم استدعاءها على نطاق واسع أيام محمد محمود ومجلس الوزراء، 2011، على أساس إنها بتهاجم الحكم العسكري وطريقته في إدارة البلاد، وفي مظاهرات الطلبة 1972، اشتهرت قوي قصيدة الكعكة الحجرية، واتعمل عليها معارضات كثير، ثم كانت "لا تصالح" اعتراضًا على معاهدة السلام.

بعيدًا عن ده، أمل كان له قصايد أكثر إنسانية على مدار أعماله الكاملة، نفكر منها قصيدة "رباب" وقصيدة "يوميات كهل صغير السن"، بس النوع ده زاد جدًا بعد 1979.

كان فيه صحيفة من أخبار اليوم، بنت ناس، والمفروض ماهاش في أجواء السياسة والمظاهرات، بس الصحيفة دي قررت ما تلتزمش بالصورة دي، الصحيفة اسمها "عيلة الرويني"، اللي قررت إنها تكسر القواعد وتروح تعمل حوار مع أمل، اللي قابلها بجفاؤه المعتاد، اللي بيخبي بيه رومانتيكته اللافتة.

بعد شد وجذب، لعب الحب لعبته، واتجوزوا، وقضوا باين يومين غسل في فندق أوريان بالاس، اللي في شارع فؤاد، وبعدين بدأت المتاعب، مش بس متاعب الحياة، لكن كمان المرض اللي أصاب أمل بعد كام شهر من الجواز.



فضلت عبلة جنبه، ورقد هو فسي معهد الأورام، الغرفة (8)،  
وسجل التجربة دي في ديوان "أوراق الغرفة (8)" وكان آخر قصيدة  
هي الجنوبي، اللي قال فيها سلام عليكم.

بعد وفاته، عبلة كتبت عنه كتاب من أبداع ما يكون، وكان  
عنوانه هو عنوان آخر قصيدة: "الجنوبي"، سحر الكتابة كله في النص  
ده. ربنا يرحمك يا أمل، ويرحم الجميع.

## أنور عبد الوهاب

### زمن الفن الجميل

وإنت داخل شارع منصور، من ناحية ميدان الفلكي، هتلاقى على إيدك اليمين كشك صغير، متر في نص متر، الكشك الصغير ده، الأغنية المصرية مديونة ليه بكثير من الفن والإبداع.

أنور عبد الوهاب، موزع كاسيت، مش موزع موسيقي، لأ، موزع شرائط. إحنا دلوقتي في أواخر الثمانينات. موسيقى "الجيل" بدأت تحتل صدارة المشهد بقيادة حميد الشاعري، وكان الإنتاج معظمه في إيد شركتين: سونار، والشرق (بعد كده انضمت هاي كواليتي سنة 1990).

الشركتين بدؤوا يفرضوا شروطهم على الموزعين، عايز تاخذ الشرائط، يبقى تاخذها جملة بسعر القطاعي، والدفع فوري، ومفیش آجل، يا عم يهديك، يرضيك، الله يخليك، مفیش فايدة.

بدأ الشباب يدوروا على الحاجات دي لدرجة إن إيمان البحر درويش كن عامل ألبوم "نفسي" سنة 1986، بس الشريط ما باعش خمس نسخ على بعض غير في 1991.

أنور كان عنده رأي إن موزع الكاسيت لا يقل أهمية عن أي طرف من أطراف العملية، ويمكن يساعد في نجاح ألبوم، أو اتجاه، أو يساعد في فشله، لأن عندهم طريقة كده في توزيع الأمور، والدعاية ليها في المحلات.

وعليه، قرر أنور عبد الوهاب يتحدى الاتجاه السائد (وده مش معناه إنه وحش، دي قضية ثانية) هو بس سأل: إيه أكثر أنواع من الغنا بيعتبر فاشل من وجهة نظر المنتجين الكبار؟ أغاني المثقفين؟ طيب.

قرر السيد أنور إنه يدخل السوق كمنتج بكل المطربين اللي بيعيهم المثقفين وبيكرهم السوق، فأسس شركة "روكي" وبدأ يانه اشترى حقوق ألبومات موجودة فعلاً: فؤاد عبد المجيد، ويحيى غنام، واشترى أغنيات مسرحية "الملك هو الملك" بتاعة محمد منير، وبعض الألبومات من هذا الاتجاه، واشترى كمان حقوق أول ألبومين عملهم حسن الأسمر، بس ما طبعهمش.

بعدها قرر ينتج، فأنتج لعللي الحجار: "لم الشمل"، وكانت وقتها حرب الخليج شغالة في 1990، وبعدها "أنا كنت عيدك".

وفي نفس الوقت أنتج لأحمد الحجار، أخو علي، ألبوم "عود"،  
اللي كانت صدرت قبل كده من سونار، في ألبوم اسمه حنين، وبعدين  
الشركة رمت الأصل، على اعتبار إنه ما باعش بستلثة ساغ.

الثلاث ألبومات دول نجحوا وقتها نجاح كبير، مش بس كده، ده  
بدأت الناس تهتم بهذا الاتجاه، وبدأ يبقى له جمهور عريض، وبدأ  
الشباب يدوروا على الحاجات دي لدرجة إن إيمان البحر درويش  
كان عامل ألبوم "نفسى" سنة 1986، بس الشريط ما باعش خمس  
نسخ على بعض غير في 1991، لما آل الحجار لمعوا في ألبومات شركة  
"روكي".

كان طبيعي إن روكي تبدأ تتوسع، فأنتجت لمدحت صالح  
ألبوم عاشق مجنون سنة 1992، وده من أظبط ألبوماته كشريط  
كاسيت متكامل، بغض النظر عن كل غنوة على حدة، وجابت  
أنغام، اللي كان بقاها كام سنة مترمطة في "صوت القاهرة" (أردأ  
إنتاج وقتها)، وعمل لها ألبوم "إلا أنا"، اللي فيه شنطة سفر،  
واتصورت بكليب إخراج عاطف الطيب.

في نفس الوقت عملت الشركة ألبوم لمطرييها: علي وأحمد الحجار  
وأنغام ومدحت صالح وأضافت لهم غنوة محمد منير من فيلم، الألبوم  
كان اسمه نجوم القمة، وكان من أعلى المبيعات سنة إصداره (1992).

بدأت الدنيا تزهره، والاتجاه ده ياخذ مساره، وعلي نزل بالالوم  
الثالث: تجيش نعيش، وبقي فيه شخصية للشركة، وأصبح اللوجو ليه  
وزن وسعر.

وبعدين؟

مفيش، أنور عبد الوهاب مات في حادثة، في أواخر 1993/ أوائل  
1994، وهو يدوب أربعين سنة، وخلّص بح، ما فضلش من  
المشروع ده، غير الكشك الصغير اللي في شارع منصور، اللي كنت  
لفترة طويلة باعدي عليه، أدرّش شوية مع الحاج عبد الوهاب،  
أبو أنور، ونترحم على أيام أنور، ويديني كام شريط من إنتاج  
الشركة، آخذهم وأروح، أسمعهم وأستمع وأتحسر، وأقول إيه؟

## رمضان البرنس

عودي

إحنا دلوقتي في سنة 1994، والبلد عموما في حالة "استقرار" على كافة المستويات: سياسة، مجتمع، فن، كله كله. ومفيش جديد، ومحدث متوقع مفاجآت. فجأة وبدون سابق مقدمات بيظهر ألبوم يكتسح سوق الأغنية، لا كان أول ولا آخر ألبوم يكتسح، بس كان ظاهرة، الألبوم ده كان عنوانه "عودي".

ليه "عودي" كان ظاهرة؟

لأنه مكش وراه أي عامل من عوامل نجاح أي عمل غنائي، يعني مفيش مؤلف نجم، ولا ملحن مشهور، ولا موزع معروف حتى، دي الكلمات والألحان وأغلب التوزيع لراجل اسمه عبد العزيز أمين، صحيح كان منتشر في الأفراح الشعبية، بس مكش له اسم في سوق

الكاسيت، ولا حتى عدى على عمل باع أكثر من ألف نسخة. (ده مالوش علاقة يانه موهوب)

ولا فيه شركة إنتاج مثلاً وقفت ورا الكاسيت وعملت له شغل دعاية وظبطت المتعهدين بحيث يبدروا الشريط في الإكشاك، ويفضل شغال 24 ساعة. الإنتاج كان لشركة مغمورة محدش سمع عنها قبله (ولا بعده) اسمها صوت الفراغة.

حتى المطرب اللي بيغني، شاب من الشرايبة، عنده 31 سنة، كبيره لعب في فرح في القللي ولو بعد خالص يبقى فسي عرب المحمدي، اسمه رمضان شاكر، ولما بدأ يغني، عبد العزيز أمين، اللي اكتشفه ورباه فنياً، سماه "رمضان البرنس".

رغم كل ده، نجح الألبوم وانتشرت الأغنية، والغريب إنها انتشرت بين شباب الجامعة، اللي كانوا وقتها متعلقين بـ عمرو دياب وحميد الشاعري وإيهاب توفيق وهشام عباس، ولما كان حد يحب يسمع حتة شعبي كان ممكن يسمع حسن الأسمر بالعافية، أكثر من كده مفيش.

الألبوم نجح يمكن لأن الكلمات شالت خطوط فاصلة متعارف عليها بين الشعبي والمينستريم، خصوصاً في أغنية "عودي".

عودي

غنوة على عودي

عودي

بعدك حنى عودي

عودي

لبلادي وحدودي

عودي

لا معنى لوجودي

لا حبايب، لا قرايب، لا سهر،

لا نجوم تضوي في ليلي، لا قمر؛

إيه كان جرى لكل ده

نعيش بعاد بالشكل ده

كل شيء ساياه هنا

ذكرى غالية لحبنا،

ليل نهار ييفكروني

بأحلى أيام الهنا:



صورتك،

عطرك،

خصلة من ضفیرتك،

همسك،

لمسك،

توبك جاب لي سیرتك؛

وهان عليك تبعدني

وهان عليك تعندي

وانا هنا وحيد

يا اللي جبك يسري في دمي

زي فمر النيل ما سال

يا اللي منك فرحي وهي

يا ام نظرة تطفني النار

يا أنا، يا هنا

ليله بُعد بمية سنة؛

كلمات غريبة على اللون الشعبي، ومع انتشار الأغنية، دخل البرنس عالم النجومية، بس كان فيه شك برضه في استمراره، كان فيه أسماء طلعت كده برضه واختفت، مع إن كان وراها شركات ونجوم، زي مجدي طلعت ومسعد رضوان وغيرهم، مع اختلاف لون كل واحد.

لكن رمضان البرنس استمر، وانتشر، وعمل ألبوم تاني نجح أكثر من الأول هو ألبوم "ارجعي"، وكانت حصيلة الألبومين انتشار اللون اللي بيغنيه البرنس، واللي فتح الباب بعد كده لاعتبار أغاني الأفراح الشعبية "ترند" في عالم الغنا، وكبر رمضان وزاد عليه الطلب، وبقي مهم يخطي العتبة الجديدة.

العتبة الجديدة كانت دخوله عالم الإنتاج الكبير، بعيدًا عن الشركات الصغيرة، حيث الاحتراف بقى على أصوله، وبعد منافسة بين نصر محروس (شركة فري ميوزيك) وطارق عبد الله (شركة هاي كواليتي) رسي العطا على طارق، ووقعوا فعلًا عقد أواخر 1997 وأوائل 1998.

في مايو 1998 كان رمضان واخد مراته وولاده محمد وسلمي، ورايحين يقضوا أجازة في راس البر، وجم عند كفر شكر وعملوا حادثة حطت فاصل لمشوار البرنس في الفن وفي الحياة، وهو يدوب عنده 35 سنة، ومن بعده اتفتحت ماسورة برنسات في الأغنية الشعبية مطربين وملحنين وموزعين ومن كل شيء، ربنا برحمه بقى ويرحم الجميع.

## رضا

### جبنا جون يا رضا

موسم 1965 / 1966، في مباراة الإسماعيلي مع الأهلي في الإسماعيلية، الإسماعيلي جاب جون، فراح واحد من الجمهور بص ع المقابر وهتف: "جبنا جون يا رضا"، فتسكت كل الأصوات، وتبدأ في الاستاد موجة بكاء حارة.

رضا اللي هتف باسمه الجمهور يومها، كان لاعب في فريق الدراويش، بس مكنتش مجرد لاعب، وكان لسه متوفي من كام يوم، وهو عنده يدوب 26 سنة، بعد ما ساهم في إنه يحط الفريق على خريطة الأبطال بعد ما كان ركب سكة الهبوط، ومشى فيها شوية.

لو رجعنا فلاشباك شوية لسنة 1957، هنلاقي إن الاتحاد المصري لكرة القدم خد قرار بـ "موسم الاستقلالات"، ودي حاجة كانت قبل الاحتراف، لما كانت الكورة في مصر هواية، وبالتالي مكنش مسموح للاعب يسيب ناديه تحت أي ظرف، إلا إذا ناديه قرر الاستغنا عنه رسمياً، لكن طول ما النادي يقيّدك أول كل موسم، فانت بتاعه لحد ما تعتزل خالص.

موسم الاستقلالات كان معناه إن كل ست سنين، ندي الفرصة للاعبية إنهم يستقيلوا من ناديهم، ويروحوا أي نادي هم عايزينه، ويققوا ملكه لحد أقرب موسم استقلالات، وده نظام ما استمرش كثير بالمناسبة.

المهم، إن سنة 1957 كان أول موسم استقلالات، فراح لاعبيه الإسماعيلي الكبار والمهمين كلهم استقالوا وراحوا يلعبوا في نادي القناة، لأنه كان بيدي فلوس كثير، عكس الإسماعيلي اللي معندوش موارد (القناة كانت لسه متأمة) وكانت النتيجة هبوط الإسماعيلي للدوري المظالم آخر موسم 1957/1958، ودي كانت السنة اللي الأهلي فاز فيها على الدراويش 8/ صفر، كان الدوري مجموعتين، والإسماعيلي كان بيلعب في مجموعة الأهلي، وكانت المباراة دي مهمة في تحديد هبوط الإسماعيلي من عدمه.

فضل الإسماعيلي في الدرجة الثانية، لحد ما ظهر رضا، وإحنا طبعًا عارفين إن الوقت ده كان فيه فرقة رضا للفنون الشعبية، وكانت مشهورة ونجوم سينما، ففريق الإسماعيلي بقى اسمه: "فرقة رضا للفنون الكروية"، وقدرُوا يرجعُوا تاني الدوري الممتاز، وينافسُوا، والجيل ده هو اللي كسب الدوري الأول في تاريخ الإسماعيلي 1966/1967.

رضا اسمه الحقيقي محمد مرسى، ومن مواليد السبت 8 أبريل 1939، ولعب في الفريق الأول، وفي المنتخب، وهو عنده 18 سنة (حاجة كده قرية من أحمد فتحي) ولما نضج، طلع بالفريق من المظالم، وكان شغال في البلدية بـ 18 قرش في اليوم.

سنة 1962، رضا خد الاستغنا بتاعه من نادي الإسماعيلي، وراح يلعب للأهلي، يدوب الخبر اتعرف، واتقلبت الإسماعيلية زي ما حصل بعد كده مع حسني عبد ربه، وحصلت مظاهرات، فاضطر الأهلي يتراجع فسي التعاقد مع اللاعب، ورجع رضا للإسماعيلي، وادوله وظيفة ب عشرين جنيه في الشهر.

الموقف ده بيقولك إن العداء بين الأهلي والإسماعيلي سابق كتير على النكسة، وده ضد اللي بيقولوا إن سبب الكراهية راجعة لإن الأهلي رفض الإسماعيلي يتدرب عنده بعد تهجير سكان خط القناة في النكسة.

24 سبتمبر 1965، لعب رضا مباراة ودية شهيرة، هي مباراة اعتزال رأت عطية لاعب الزمالك، اللي شارك فيها اللاعب الإنجليزي ستانلي ماتيوس، وسجل رضا في المباراة دي آخر هدف في حياته، والماتش انتهى 1/1.

بعدها بأربع أيام كان مسافر إسكندرية بعربية واحد صاحبه، وعمل حادثة، والعربية اتقلبت، وراح فيها رضا، بعد ما لعب في تاريخه الصغير اللي محدش لعبه وقتها، تخيل كان رصيده 80 مباراة دولية، ولعب في الأولمبياد وكاس الأمم الأفريقية وغيره، الله يرحمه ويرحم الجميع.

## سيد يا درويش يا نابغة ليه تموت مسموم

لما نتكلم هنا عن سيد درويش، فده مش أي حاجة حاجة عن  
فنه ودوره في المزيكا، ده موضوع تاني كبير، إحنا هنا مهتمين بإن  
فيه شاب اتوفى وهو عنده 31 سنة، قلب مسيرة المزيكا العربية،  
وأسس لكل اللي بنسمعه لحد لحظتنا دي.

سيد اتولد يوم الأربعاء 17 مارس 1982، في إسكندرية، في  
كوم الدكة، بس مش زي سعيد الهوا، دخل المعهد الديني وأبوه مات  
وهو عنده سبع سنين، واتجوز وهو عنده 16.

موهبة كانت أوضح من إنها تستحي، من وهو في المعهد  
الديني بدؤوا يجيبوه يحيي الأفراح، وياخد أجر، بس ما اتمكنش وقتها  
من إنه يحترف الفن بشكل كامل، فاشتغل بتا، بس هيروح من

موهبة فين؟ الراجل المفاول لقاه بيغني للعمال وبيحمسهم،  
فراح قدم له عرض إنه يتفرغ للغنا ويحتفظ بالأجر وقد كان.

بعدها اتعرف سيد درويش على ولاد عطا الله البنانيين، وخدوه  
معاهم بر الشام، وهناك درس مزىكا على أصولها، واتعلم كتابة  
النوتة، ويقال إنه هو اللي ملحن "يا مال الشام والله يا ماله" في الفترة  
دي.

رجع درويش من الشام، وراح تاني ورجع تاني، وبدأ يحاول في  
إسكندرية، وجه القاهرة سنة 1917، وكل اللي عاشه بعدها ست  
سنين، واتوفى وهو عنده 31 سنة 1923، تحديداً يوم الاثنين 10  
سبتمبر، بعد ما عمل كل البلاوي دي.

في الست سنين اللي عاشهم درويش في القاهرة، حصلت  
حاجات كتيرة على المستوى الشخصي والعام، منها ثورة 1919،  
اللي كان سيد من أكبر مؤيديها، وياما جنن الإنجليز اللي منعوا ذكر  
اسم سعد زغلول في أغنية، لأنه كان بيعمل توريات، زي يا بلح  
زغلول وأشياء من هذا القبيل.

اليوم اللي اتوفى فيه سيد درويش، كان يوم رجوع سعد زغلول  
من المنفى، وهنلاقي نجيب سرور قايل إيه:



سيد يا درويش يا نابغة ليه تموت مسموم  
والشعب ملبوخ فرجة سعد من منفاه  
ميت في يوم القيامة! مين على المرحوم  
هـ ييكي؟ والكل وشه أصبح زي قفاه

فكرة إن سيد درويش مات مسموم مسيطرة على ناس كثير،  
منهم حفيده إيمان البحر درويش. طبعًا فيه ناس بتقول إنه مات  
عادي أوفر دوز من الكوكابين، لكن فيه أقاويل كثير إنه اتقتل  
بالسم. بس مين قتله؟

فيه كلام كثير زي مثلاً إن فيه مطربة درجة تالته قتلته علشان هو  
ما رضيش يساعدها، وده كلام حياة صبري، اللي بيقولوا إنه كان  
متجوزها عري.

عمومًا، الله أعلم، بس هو الله يرحمه كان فعلًا متعدد العلاقات  
النسائية، وبيتورط جامد، ومن الحكايات المعروفة حكاية أغنية "يا  
ناس أنا مت فحبه".

هو كان بيحب اتنين فوقت واحد، والاتنين عارفين، واحدة  
اسمها فردوس والثانية اسمها "رضوان" (أيوه، ست اسمها رضوان)  
وفضل، دي تخصصه يروح عند دي، لحد ما رضوان قفشت عليه،  
ففردوس ما رضيتش ترجع له إلا لما يديها أماره، فراح عامل

الغنوة الجميلة دي، إنه مات من حبها والملايكة بستحاسبه،  
وفالآخر رفض إنهم يدخلوه جنة "رضوان" وفضل جنة فردوس، في  
تورية زي حكاية بلح زغلول كده.

الغريب إنه مع كل النجاح اللي حققه سيد درويش البحر، عاش  
فقير ومات فقير، وكانت مسارح عماد الدين تبقى بستغني كلها  
ألحانه، وهو ماشي في الشارع معندوش سحتوت، الله يرحمه بسجد  
خير له لسه مغرقنا لحد بعد ما مات بقرن تقريباً، الله يرحمه، ويرحم  
الجميع.

## صالح الشرنوبي

### اللا منتمي

سيك إنت من أي كلام يتقال عن الصعاليك أو الفنانين البوهيميين اللي عاشوا حياة متشردة أو الأسماء اللي بنت اسمها وشهرتها مع الموضوع ده، وخليك مع الشاعر صالح الشرنوبي، ده القلب اللي عملوا عليه نموذج البؤس في الحياة والممات، وعاش سنين عمره القصير ضياع في ضياع رغم أعماله الكثيرة اللي سابها.

اتولد الشرنوبي في بلطيم يوم الاثنين 26 مايو 1924، وسبحان من خلاه يكمل التعليم الأولي في الأزهر، لأن دي كانت آخر حاجة يلتزم بيها سواء في التعليم أو في الشغل أو في أي موضوع باستثناء كتابة الشعر.

بدأ أهله يعاملوه على إنه مجنون بدري بدري نتيجة تصرفاته من نوعية إنه يقعد يآلف الشعر بصوت عالي في أوضة مقفولة بالساعات،

أو مثلاً يرجع من الدراسة بعد نص الليل، فص أمه تسأله، في يحكي لها حكاية لطيفة:

كان واقف مستني الركوبة اللي هتوديه البيت، والمعهد بعيد جداً عن البيت، فتعدي شحاتة وشها حلو، يديها كل الفلوس اللي معاه، ويقول لها: "لوجهك لا لوجه الله"، فزملائه يروحوا يشتكوه عند مدرسههم (اللي هو محمد متولي الشعراوي) فيقعد يلومه ويهزقه، فيقرر يروح بيتهم مشي، ويرفض ياخذ فلوس يروح بيها.

حاجات من دي كثير، فأهله يعتوه مستشفى المجانين شوية، ويخرج، ويروح القاهرة يحاول يدخل دار العلوم، فما يفلحش، ولأن نجمه خفيف، يروح يدخل عالم المكيفات، ويبدأ سكة اللي يروح ما يرجعش.

أهله يلموه، ويرجعوه بلطيم، ويقعد شوية، ويشغل مدرس ابتدائي، لحد ما صالح جودت بيعت له علشان ياخذ منه قصيدة تغنيها لور دقاش (مش لوردكاش)، ودي أول مطربة لبنانية تيجي مصر، وفنسفس الوقت أمه ما ترضاش تجوزه بنت عمه، فيهج تاني على مصر، ويبدأ رحلة جديدة من الضياع.

محاول تانية مش ناجحة لدخول دار العلوم، وبعدين التحاق بكلية أصول الدين، وسأها، والشرعية وسأها، وطبعاً مفيش فلوس، ومفيش دخل، ومفيش سكن، فيعيش في عشة فراخ فترة، وفي

مغارة لقاها في جبل المقطم، وفي الشارع، وكل ده وهو بيكتب  
شعر بانتظام، وفي مغارة المقطم كتب قصيدة "على ضفاف  
الجحيم"، وعمل لها مقدمة تلخص لك اللي حصل كله:

إليك يا قاهرة إلى أضوائك القاسية التي عذبت عيني وأنا قابع  
هناك في الجبل المضيف بصخوره الحانية وكلايه العاوية وصمته  
الكتيب وإلى هؤلاء المترفين الكسالى الذين ينكرون علي إيماني بالألم  
وعبادتي الدموع وإخلاصي للحزن .

صاحبه المخرج إبراهيم السيد جابه يعمل أغاني فيلم فتنة، وسمع  
عنه كامل الشناوي، وقرا شعره، فراح جابه، وعينه مصحح في  
الأهرام، على أساس بس يلاقي لقمة وسكن، فيشتغل شوية،  
وينفض ويرجع تاني للضياع .

في الآخر رجع بلدهم وعاش في بيت أهله شوية، وياكله  
الاكتئاب، ويكتب:

الحمد لله على ما قضى

والشكر له على ما أمر

فما أظن الأرض تحوي فتى

وجوده كان إحدى الكبر

مثل فتى يدعونه شاعراً  
وما بغير الموت يوماً شعر  
يبكي بلا دمع وفي قلبه  
ما يفرق الدنيا إذا ما انفجر  
لا يعرف الصبر لكنه  
لما رأى طول الظلام اضطبر

ويفضل على الحالة دي، بس مش كثير، لحد ما يجي يوم الاثنين  
17 سبتمبر 1951، فيقرر إنه 27 سنة في الدنيا دي كفاية قوي،  
وينتحر.

بعد وفاته — فترة يجمع عبد الحى دياب أعماله الضخمة في  
ديوان قريب من 700 صفحة، ويطبعوه في سلسلة "تراثنا" ربنا يرحمه  
ويرحم الجميع.

## طرفة بن العبد اللي مني مزعليني

طرفة بن العبد شاعر جاهلي، يعني عاش قبل الإسلام. فيه ناس  
بستعامل مع "الشعر الجاهلي" باعتباره كل الشعر القديم  
والصعب، بس الجاهلية معناها بس فترة قبل الإسلام.

هو كان من البحرين، والبحرين كانت متحضرة كتير عن قلب  
شبه الجزيرة، أبوه وعمه وجده وخاله كانوا شعرا مشهورين، وليهم  
اسم في عالم الشعر.

اتولد، وبعد شوية أبوه مات. عمامه استدلوا مع أمه، مفيش  
فلوس، هو عاش طفولة مشردة، وصاع مع العيال، وبدأ يسكر،  
ويروح مغامرات فالصحرا، ويتشاقى مع قطاع الطرق والصعاليك.

بعد شوية، أخوه جابه، عيب الحال المايل اللي إنت فيه، خد لك  
كام ناقة وروح ارعاهم، بس المثل قال إيه:

فيتك ما انتهيت، والطبع فيك غالب

والكلب ديله ما ينعدل، لو علقه فيه قالب.

العيال ضحكوا، وسرقوا جمال أخوه، فأخوه طرده، راح لابن  
عمه، فابن عمه طرده، فرجع للصياغة والضياغ والجوع.

خاله، وكان شاعر مشهور اسمه "التملمس"، لما سمع إن ابن أخته  
تقريباً راح فالوبا، لقي له فرصة إنه يوصل لبلاط "عمرو بن  
هند"

عمرو كان ملك "الحيرة" والبحرين كلها كانت تبعه، ولقي  
صاحبنا شاعر جامد، مع إنه سنه صغير. احتضنه، والشاب قال:  
خلاص، باضت لك فالقفص يا طرفة.

ما تعرفش بعد كده إيه اللي حصل، بس غالباً طرفة غلس على  
واحدة من "حريم" عمرو بن هند، ما هو العرب ما يستفزههم إلا  
الستات زي ما إنت راسي. المهم، إن الملك جاب طرفة وخاله، وادى  
كل واحد جواب، وقال لهم: روحوا بالجوابات دي للوالى بتاعي على  
البحرين، أمرت لكل واحد بمكافأة حلوة.



مشيوا، وهم فالطريق، دار بينهم حوار شبه الحوار ده (يعني ما معناه كده):

أنا قلبي متوغوش، بأقول نفتح الرسالتين، ونشوف فيهم إيه؟  
وافرض فتحناهم، هنعرف إيه اللي فيهم؟ إحنا أميين يا خال، لا  
بنعرف نقرا ولا نكتب.

نتصرف يا ابن أختي، الفار بيلعب فعبي، وشامم ريحة غدر.  
مش هأفتح حاجة، غير عند الوالي.

شوية عدوا على حد بيعرف يقرأ ويكتب، المتلمس ادى  
الراجل الرسالة، فض الختم، فالقارئ ده قال له: الملك بيطلب  
من الوالي يقتلك.

الغريبة إن طرفه، رغم كده، ما رضيش يفض الختم بتاع رسالته،  
كان متخيل إن الملك مش ممكن يستغنى عنه، وساب خاله ينفذ  
بجلده، وهو راح بـ كل إباء وشتم للوالي، وطبعًا رسالته طلع  
مكتوب فيها ما معناه: أقتله.

الوالي ما رضيش ينفذ الأمر، وبعث لـ عمرو بن هند، يا عم ده  
قريبى، ولو قتلته أهله مش هيسيبوني، ابعت حد ينفذ، وأنا  
أحبسهولك، لحد ما تبع، وقد كان، جابوله جلاده لحد سجنه.

كان عمره كام بقى بعد الهيصه دي كلها؟

سنة وعشرين سنة.

كتب فيهم ديوان، من حيث الحجم متوسط، لكن من حيث الجودة ممكن تعتبره من عيون الشعر العربي، بالذات القصيدة الأطول اللي هي سدس ديوانه، واللي بيعتبروها واحدة من القصائد السبعة المشهورة باسم "المعلقات".

الفكرة الأهم في قصيدته دي، فكرة الظلم لما ييجي من الناس اللي هم المفروض قريين منك، حاجة كده زي التحفة الخالدة للفنان شيبه: "اللي مني .. مزعليتي". بس قصيدة طرفة طبعاً أفخم:

وظلم ذوي القربى أشد مضاضة

على النفس، من وقع الحسام المهند

الترجمة: ظلم الناس القريين أشد مرارة وألم من تأثير السيف.

ربنا يرحمك يا طرفه، ويرحم الجميع.

## عصام عبد الله

### في قلب الليل

مع إن عصام عبد الله بالنسبة لي هو أجمل حد كتب أغاني في تاريخ مصر، بس عمري ما فكرت فيه بمنطق ولد وعاش ومات، وحصل على، وتولى منصب، وهكذا أشياء.

عصام كان واحد من أهم كتاب الإعلانات في مصر، في أواخر السبعينات، ثم طول الثمانينات، ولحد ما مات يوم الخميس 21 مارس 1996، وهو عنده 41 سنة، لأنه من مواليد الجمعة 14 أكتوبر 1955. وكانت الإعلانات دي أكل العيش، علشان كده مكنتش مضطر يعمل أغنيات باسميها "أغاني مجانية"، وكل غنوة عملها كان فيها فكرة، تعجبك أو ما تعجبكش دي قصة تانية.

كانت شلته علي الحجار ومصطفى علي إسماعيل وشوية محمد منير ومهندس الصوت إبراهيم عنان، وكان بيتقابلوا في عمارة شهيرة

أغلب سكانها من الشلة دي، كانت في جاردن سيتي (18 شارع  
معمل السكر) وكانوا يتقابلوا في ستوديو صوت اسمه "إمباير"،  
ويعيشوا بقي.

عصام لحق جاهين، وجاهين شاف إنه هو مستقبل الأغنية المصرية،  
لأنه لغى الفواصل بين العامة والفصحى، ولأنه يتمتع بخيال  
مالوش حدود.

وكان فيه تجربة باعملها في التسعينات، وأوائل الألفية، إني  
أسأل أي حد من الأصدقاء المثقفين: تعرف عصام عبد الله؟ فيقول  
لي: لأ. طيب ممكن تقول لي قائمة بأحسن عشر أغاني بتحبهم،  
مكنش ممكن أبداً حد يسمي لي قائمة مفيهاش كذا أغنية لعصام عبد  
الله: "قلب الليل"، "كان إحساسي صحيح" لعلي الحجار، "لو بطلنا  
نحلم غموت" و"سحر المغنى" و"الطول والليل والحرية" و"حتى حتى"  
لمحمد منير، و"وحدانية" و"من بعيد" لأنغام، وحتى عمرو دياب ومحمد  
فؤاد عمل لهم شغل مميز في بداياتهم.

في الأغاني دي عصام عمل حاجة مبهرة، وهي إنه تقريبا ألف  
لهجة. كثير من الأغنيات اللي كتبها تبان بدوية أو صعيدية أو أي  
لهجة لأي قبيلة، بس اللي حاصل إنما من منشآت عصام عبد الله،  
وده اللي بقي بعد كده سكة فالكتابة بتطلب بعينها.

لسبب ما، غامض، عادة أغنيات عبد الله بستحسب في تراث  
عبد الرحيم منصور، وأحياناً مجدي نجيب، يمكن لأن الاسمين دول بقوا  
ملاصقين لتجربة منير، باعتبارهم كتبوا أغلب كلماته، بس برضه ما  
تفهمش إيه علاقة ده بأغنية زي "فقلب الليل" مثلاً.

بمناسبة "فقلب الليل"، ألبوم علي الحجار، إنتاج 1987، واللي  
كان تجربة فريدة من نوعها، وتقريباً الألبوم الوحيد اللي أنتجته شركة  
"إمباير"، واللي ظهر فيها عمر خيرت كعازف درامز لا ملحن ولا  
موزع، الألبوم ده فيه تحفتين لعصام.

الأولى أغنية "روحي فيكي تروح"، المتأخدة من تراث مغربي،  
ووزعها كامل الشريف الموسيقار العظيم المنسي. فالغنوة دي  
تركيبات جمل وصور وقوافي محتاجة مقال منفرد:

حسبك، شتيقي العقل اشتات

وجنيقي نجوم السموات

وخطيقي الحسن المسموح

إن قلتي وداع أنقسم اتنين

فارس متمرد ع القوانين

وكسير مسلم ما بـ يبوح

والثانية فقلب الليل نفسها، اللي هي واحد قابل واحدة بريستيتوت، حبها، وحب يحرقها، هو اعتبر البريستيتوتشن عبودية مش خطيئة وده شيء مدهش. بس هي سابتة ورجعت لقيودها، وصور ده بفكرة إنه قابل مهر مربوط وحرره، بس المهر رجع لقيده، إيه العظمة دي!

اللافت بالنسبة لي إن عصام نفسه كان بيتعامل مع نفسه باعتباره حاجة عادية، وإن الناس بتبالغ في تقديرها لكلماته، وإنه مفيش أي فرق بين الأغاني والإعلانات! وده بحسب كلامه لصديقه الكاتب جمال الجمال، اللي لما اتوفى عصام كتب مقال بديع في فراقه، لسه فاكتر عنوانه لحد دلوقتي: "ما بطلش يحلم .. ومات".

## علي مهدي فوق الشوك

اسم مش معروف قوي في قوائم المؤلفين حاليًا، مع إنه كان نجم فوقته، وكان واحد من مؤلفي الصف الأول في الخمسينات والستينات، واشتغل مع كبار الملحنين والمطربين، وله أغنيات تعتبر علامات في تاريخ الأغنية المصرية، يمكن لأنه مات صغير، اتوفى وهو عنده 37 سنة، يعني 1968، في إسكندرية، مات للأسف غريق في البحر.

لما نتكلم عن علي مهدي، يبقى تنسى بقى مصطفى كامل أو أمل الطائر أو يوسف طه، أو أي حد كتب أغاني عذاب، الراجل كان أستاذ في الحكاية دي، لدرجة إن أكثر أغنية متفائلة غناها هي "يا لعبة الأيام" بتاعة وردة، اللي لحنها السنباطي.

مهدي كان هاوي رغم عشرات الأغاني اللي كتبها، وكان رومانتيكي فعلًا في حياته، لدرجة إن بنته الوحيدة، سماها "عطر الصباح"، وكان مصدق فعلًا أجواء البكائيات اللي كان بيسكتبها، وبيحكوا عنه مواويل في القصة دي أبسطها إنه لما كان شاب صغير، كان بيسمشي في الشوارع يلم الطوب، ويوديه البيت، ويغطيه، ولما يسألوه، يقول لهم: الحصى بردان لازم يتدفى.

لما اشتهر في أوائل الستينات، أم كلثوم طلبته، تعالى يا ابني، سمعي، واشترت منه غنوتين فعلًا، وادت واحدة لبليغ يلحنها، اسمها مستجير الحب منك. فهو طبعًا روح البيت متخيل إنّا هتغنيها أول خميس جي، بس ده مكش النظام بتاع أم كلثوم، كانت الأغاني بتخضع لـ جدول زمني، يا راجل، دي اشترت "حكم علينا الهوى" من عبد الوهاب محمد سنة 1959، غنتها سنة 1973.

المهم، صاحبنا استنى شهر، التاني، أم كلثوم ما غنتش حاجة، راح ناشر الغنوتين، كمنصوص، في الجرايد، راحت حالفة ما هي مغنياهم، وماتوا الاتنين ومفيش حاجة اتنفذت.

مهدي اتولد في بين السرايات، السبت 21 فبراير 1931، أبوه وأمه اتطلقوا وهو صغير، عاش مع أبوه، أبوه اتجوز كذا مرة، اتمرط كثير، لحد ما جاله شلل نصفي وهو عنده 12 سنة.



راح بعدها عاش مع خاله في الجمالية، وفضل هناك لحد ما اشتغل في الإذاعة وكتابة الأغاني، وبعدين لسبب غامض استقال من الإذاعة وتفرغ لكتابة الأغنية، مع إن السائد إن شغلك في الإذاعة بيسهلك عملك كمؤلف، المهم إنه فضل كده لحد ما اتجوز وخلف بنته لوحيدة.

أهم شغل عمله علي مهدي، أغنية فوق الشوك، بتاعة عبد الحليم حافظ، وحكيت قصتها أكثر من مرة في أكثر من سياق، وعموماً هي أول أغنية غناها حليم من ألحان عبد الوهاب بره الأفلام، وكانت السبب في إنهم يكونوا شركة صوت الفن.

ومن أغانيه الثاني المهمة أغنية "لعبة الأيام" اللي غنتها وردة أول ما جات مصر أواخر الخمسينات من ألحان رياض، وبالمناسبة إذا كان بليغ أميز حد اشتغلت معاه الفنانة الجزائرية، فرياض السنباطي هو اللي قدمها، وعلى اسمه سميت ابنها الكبير: رياض.

ومن أشهر الأغاني اللي عملها، أغنية ظهرت بعد وفاته بـ سنين، هي أغنية "في قلبي جرح" اللي غناها عماد عبد الحليم، ودي كانت أول أغانيه في السوق، لحنها وأنتجها حلمي بكر، وباعها بعد كده لـ "صوت الفن". ولما عماد اتوفى غنتها أنغام.

يوم الأربعاء 18 سبتمبر 1968، كان علي مهدي في إسكندرية مع أسرته، وكانت بنته وقتها عندها تسع سنين، وكانوا قاعدين في مطعم

على البحر. يدوب خلصوا أكل، وقرر مهدي إنه يزول البحر ياخذ  
غطس، بس للأسف كانت دي آخر حاجة يعملها في حياته لأنه  
غرق، وبنته الصغيرة ما قدرتش تزول تنقذه.  
ربنا يرحمك يا مهدي، ويرحم الجميع.

## عماد عبد الحليم

### الضباب

36 سنة، هي كل السنين اللي عاشها عماد علي سليمان، المشهور في تاريخ الأغنية المصرية باسم "عماد عبد الحليم"

عماد هو أخو الملحن محمد علي سليمان (أبو أنغام). وعليه، يبقى عماد عم أنغام، بمناسبة إنه عمها، لسه فاكّر إيفيه كتبه الراحل الساخر حسام حازم: "عماد عبد الحليم هو عم أنغام لكنها في الغناء سته". بس اللي بيحبوا أنغام مؤكّد يعرفوا أغنية "يا أرق وأغلى وأطيب قلب"، الأغنية اللي سجلتها مع أبوها وعمها، وباين في التسجيل صوت عماد: "الله يا نغم" بعد وصلة سلطنة في الكوبليه الأول للأغنية.

عماد له أخ تاني مطرب هو محمود علي سليمان الذي ماجاش من نصيبه إن يتعرف ويقي مشهور زي بقية العيلة، مع إنه صدر ألبومات من "صوت القاهرة"، أو يمكن لهذا السبب. غير كده محمد علي سليمان اتجوز مطربة سكندرية أخوها ملحن اسمه فتحي خالد، اللي عامل موال "طلعت فوق السطوح" لبدرية السيد.

وزي ما إحنا شايفين، عماد اتولد في تحت شرقي، فكان طبيعي إنه يبدأ مشواره وهو طفل صغير، ويغني في حفلات، لكن اللحظة التي عرفه فيها الجمهور كانت وهو عنده 13 سنة، لما عبد الحليم حافظ قدم المطرب الصغير للجمهور في حفلة جامعة القاهرة، سنة 1973، والحكاية دي حكيناها بالتفصيل في سياق تاني.

الروايات حوالين تبني العندليب لعماد متضاربة، وفيه حملات صحفية حصلت للتشكيك فيها، بس حكاية سمير صبري الأقرب للمنطق، وهتلاقى فيها في سلسلة عملناها عن حليم، ومفادها إنه تبناه بالمعنى الحرفي معنويا وماديا، لدرجة إنه أجر له شقة وصرف على تعليمه، وهكذا وهكذا.

على أي حال، مرض عبد الحليم زاد، واتوفى بعد يدوب كام سنة، وعلى قد ما كانت صدمة المرض، وبعده الوفاة، بدأ اهتمام إعلامي خاص بالمطرب الذي شال اسم عبد الحليم، واستضافوه في برامج فنية كثير، وانتشرت إشاعة، مش معلومة المصدر، إن عماد هو

ابن غير شرعي لأسطورة الغنا، وهو ده اللي ادى مسلسل "الضباب"، الذي لعب عماد بطولته سنة وفاة حليم، فرصة كبيرة للنجاح، والانتشار على نطاق واسع. وبقي اسم "عماد عبد الحليم" منافس كبير لمطربي جيله من أمثال هاني شاكر ومحمد ثروت، في وقت مكنتش محمد منير ولا علي الحجار لسه قدروا يثبتوا وجودهم، ومكنتش مدحت صالح لسه ظهر أصلًا، وما وصلناش لسجيل عمرو دياب من أصله.

البداية المثيرة للنجم الصغير مكنتش في صالحه، كان هناك استعجال واضح من أخوه الكبير، هو الاستعجال نفسه الذي خلاه يطرح أنغام كمطربة وهي لسه بنت تسع سنين، لكن في حال عماد كان تركيزه بس إزاي يدفع المطرب الشاب، ويخليه في صدارة المشهد الإعلامي، من غير ذرة تفكير في مشروع فني.

نجح مسلسل "الضباب"، اللي اعتمد على فكرة تحدي اليتيم، المستلهمة من حياة عبد الحليم، وبعدها عمل عماد مسلسل عن حياة عبد الحليم مباشرة، كان اسمه "العندليب الأسمر"، بس ما نجحش زي ما نجح "الضباب".

استمر عماد بعدها بالقصور الذاتي، وخذ بطولة أعمال قليلة، منها أفلام سينمائية، وألبومات أشهرها "طريق الأحباب"، اتعرفت منها أغنيات زي: في قلبي جرح، وليه يا دنيا حظي معاكي كده. لكن

مؤشر النجاح كان بسيطاً يوم بعد يوم، بعد ما ظهر جيل جديد، له ذوق مختلف، غير شوشرة كبيرة في أمور شخصية ما نجش نخوض فيها على أي نحو.

مع مطلع التسعينيات، كان عماد عامل زي المطرب المعتزل، مع إنه يدوب كامل العقد الثالث، لحد ما جه الرحيل الحزين، لما أصحابه سابوا جثته في الشارع، ومشوا، ربنا يرحمه ويرحم الجميع.

## عمر فتحي

### على على على

بعد وفاة عبد الحليم حافظ، كان السؤال: مين اللي هيوثره  
فنيا؟ كان فيه أسماء كثير، وكل واحد كان فيه سبب يرشحه لسكده  
(بغض النظر إن ده ما حصلش مع أي حد) بس كان واحد من  
المطربين دول عمر فتحي.

عمر كان من جيل محمد منير وعلي الحجار ومحمد الحلو، مواليد  
الأتنين 11 فبراير 1952، وكان أولهم في دخول عالم النجومية، وده  
كان له أسباب أهمها إن اختار لنفسه ملامح فنية من اللحظة  
الأولى: أغنية خفيفة مرحة، مش مهم قوي إنما تكون طرية، ولا فيها  
أي استعراض للصوت، ولا حتى في الألحان والتوزيعات، وكل ده  
كان جديد وقتها، وكان أول مطرب يطلع يغني في حفلة من غير ما  
يلبس بدلة كاملة، ويقف قدام الجمهور بلبس كاجوال.

لكن مش بس الملامح الفنية، واستايل اللبس، هم اللي إدوله  
النجومية المبكرة، هو كمان كان محظوظ كثير، وإحنا معاه، إن فيه  
كثير تحمسوا له، سواء من جوه ماسيرو (اللي كان لسه مؤثر جداً  
في صناعة الأغنية) أو من براها، خصوصاً الفرق المستقلة.

من جوه ماسيرو كان فيه اتنين بيقدّموا له الرعاية: عمر  
بطيشة، وفتحى عبد الستار. لاحظ: عمر وفتحى، ومنهم اتكون  
اسمه: عمر فتحى، لأن اسمه أصلاً محمد عبد المنعم، وكان قدم كذا  
أغنية قبل ما يبقى اسمه كده، باسم محمد الهندي.

من بره ماسيرو كان صلاح جاهين، اللي محدش كثير بيتكلم  
عن دوره فاكتشاف النجوم ودعمهم ورعايته ليهم من أول أحمد  
زكي لحد شرف منير، كمان فرقة رضا اتبنت عمر فتحى فترة وقدموا  
عدد من الأغاني والموشحات لفؤاد عبد المجيد وغيره، واشتغل  
كمان مع فرقة المصريين وهاني شنودة.

فتحى خد طريق النجومية زي الكتاب ما بيقول، وبعد الغنا بدأ  
يمثل، واشتغل في مسلسلات كثير، كان منها "حسن ونعيمة" مع  
شيريهان، وده حقق وقتها نجاح كبير، ولحد ما اتوفى صدر له 11  
ألبوم، منها 4 عن أعمال درامية، و7 ألبومات كلهم بـ بيدؤوا  
بكلمة "على": على قلبي، على إيدك، على مهلك، على فكرة،  
على سهوة، على شرط، على إيه.



بدري بدري اكتشف عمر فتحى إنه مريض بالقلب، عنده ضيق في الشريان التاجي، وده بسبب له أزمة، ولأن عمر فتحى كان من المرشحين لخلافة حلیم زي ما قلنا، اتقال وقتها إنه عايز يبقى شبه عبد الحلیم، فبيصتّر حكاية المرض، رغم إنهم قالوا كده عن عبد الحلیم نفسه، وطلع مريض بجِد، واتوفى.

بس للأمانة، بالفعل كان فيه هوجة لتقليد عبد الحلیم لفترة طويلة. في كل حاجة، بما في ذلك المبالغة في إظهار اليتيم، حتى بين مطربين كان ليهم أب وأم وإخوات عايشين! لكن فدي عمر فتحى مكش بيتسلبط.

سنة 1986، تحديدًا يوم الأحد 28 ديسمبر، اتوفى عمر فتحى وهو عنده 34 سنة، لما جات له أزمة قلبية وما لحقش ياخد الدواء، ووقتها انتشرت إشاعة إن فيه شبه جنائية في الموضوع، وإن الشغالة تواطأت مع مجهولين (وبعضهم سمي أسماء لمستولين) وخبت الدواء، ولما جات له الأزمة ادعت إنها رايحة تجيب الدواء، وقفلت عليه الباب، وسابته لحد ما اتوفى.

الله أعلم بالحقيقة، المهم إن رحيل عمر فتحى المبكر ما إدالوش فرصة لاكتمال تجربة، والسنة اللي اتوفى فيها شكل الأغنية اتقلب تمامًا، وبقي فيه نجوم تانيين بأشكال تانية، وعدى الزمن وبقي مجرد ذكريات بيفتكرها بس المهتمين بتاريخ الغناء، ربنا يرحمه، ويرحم الجميع.

## كاميليا

### الواقع فاق الخيال

مش عارف إزاي مفيش عمل درامي انتبه لقصة حياة الفنانة كاميليا، صحيح فيلم "حافية على جسر الذهب"، وهو فيلم جميل، واخذ تلميحات من حياتها، والبطلة اسمها كاميليا، وأحمد سامح بدال أحمد سالم، وعزيز يعني الملك، بس الحكاية دي أصلًا بعيدة عن اللي حصل، بعيدة خالص.

كاميليا مواليد 1919، تحديدًا السبت 13 ديسمبر، أبوها وأمها مسيحيين، بس اتبناها راجل يهودي، فسبقت يهودية، ولو إنت مش عارف كاميليا، يبقى تفتكر فيلم إسماعيل ياسين بتاع "جزر زرزور"، هي كانت مراته، أبوه هي لهطة القشطة دي.

ولأن جمالها سابقها زي ما حضرتك عاينت، عاشت حياة درامية أكثر من الأفلام اللي قدمتها، وماتت ميتة درامية غامضة، لسه لحد دلوقتي مش مفهومة.

أولكشي كان أحمد سالم، والراجل ده موجود عنه مقال في الكتاب اللي بين إيدك دلوقتي، لأنه هو الثاني كان ابن موت، قدرت كاميليا تنشن على أحمد سالم، اللي كان طيار هوائي، حبها، وخذها وبدأ يصرف عليها تمهيداً لإنفا تمثل، الكلام ده كان سنة 1946، يعني وهي عندها 27 سنة، وجاب لها محمد توفيق (الممثل اللي اتوفى وهو عجوز قوي) يعلمها الإلقاء والتمثيل والذي منه.

لسبب مجهول، سالم كان بيعلمها ويصرف عليها ويحجب لها فساتين وشنط وجزم من الغالي، بس مش بيعمل لها أفلام، وفكرة إنه أصله وقع فلدباديها دي مش داخله دماغي.

المهم، راحت هي لفت من وراه، وصاحبت يوسف وهي، فقال لها: فكك من أحمد سالم، تعالي أنا هأظبطك، أنا باعمل فيلم اسمه القناع الأحمر، تعالي خدي فيه دور.

أحمد سالم عرف، قاله: لو عايزها خدها، بس إديني أرضيتها، كام يا معلم؟ 3 آلاف جنيه (إحنا في سنة 1947 ما تنساش)، وبعد فيلم يوسف وهي، عملت حاجة مع عز الدين ذو الفقار، ودخل أنور

وجدني ع الخط، وأحمد سالم بدأ يقولك: طب ما جحا أولى بلحم  
توره، وبدأت شنيات السينما المصرية تتلم حوالين المزة.

خناقات وخلافات وانسحابات وعذابات، ورجالة هيمانة، وجواز  
عربي، وقصص التين، وفوق كده 21 فيلم مثلتهم، بالإضافة لفيلم  
أمريكي هوليوودي اسمه "كايرو رود" مع الممثل إيريك بورتمان، وكل  
ده في ثلاث سنين بالعدد، وللأسف المساحة هنا مش هتسمح  
بحاجة، دي عايزة مسلسل ستين حلقة.

لكن كل ده نقطة فبحر، لأن موضوع كاميليا الأصلي مكش  
فالقن، وإنما في علاقتها بالملك فاروق وإسرائيل والموساد  
والمخابرات البريطانية، وكل اللي بالك فيه، أصلًا الفترة دي كانت  
كلها لبش، دي كانت فترة قيام دولة إسرائيل، وحرب 1948،  
والجاسوسية كانت مهنة أكثر انتشارًا من بيعين المناويل في ميدان  
طلعت حرب.

هي كانت على علاقة بالملك، وبالمناسبة الممثل اللي كان فاروق  
غيران من علاقته بيها مكش أحمد سالم، كان رشدي أباطة، وتحت  
التهديد والضغط رشدي قرر يبعد عنها نهائي.

طبعا مش هتلاقي أكثر من الكلام عن الفترة دي، ومين زقها  
فطريق الملك، وهي كانت شغالة لحساب مين، ومين الظابط اللي  
كان بيشغلها، وكانت إيه مهمتها بالظبط، هل بس نقل معلومات،

ولا كمان توجيه الملك، ولا ولا، بس الأكيد إن الشبهات كانت  
محاوطاها علشان كده كانت بتتهم إنها تلم تبرعات للجيش،  
ولفلسطين وتعمل حفلات للمناسبات دي، والثاني إن يوسف رشاد  
طبيب الملك وقائد الحرس الحديدي مكنش طايقها، والأخير إنها ماتت  
يوم 31 أغسطس 1950، وهي عندها 31 سنة، ماتت في طائرة كانت  
رايحة سويسرا، ماتت وانحرق وما فضلش منها غير فردة جزمة.

آه، نسيت أقول لك اسمها الأصلي: ليليان ليفي كوهين  
رنا يرحمها بقى ويرحم الجميع.

## محمد عبد الوهاب

### الصدمة

يوم الخميس 31 أغسطس 2006، يوم عادي، فريق النادي الأهلي يستدرب في ستاد مختار التتش، جوزيه المدير الفني، حسام البدري المدرب العام، الجهاز الفني، اللاعبة كلهم متحفزين لماتش الصفاقسي اللي جي بعد 9 أيام، في بطولة رابطة الأبطال، اللي كان الأهلي حامل لقبها.

الكورة وصلت لـ رامي ربيع، باصاها لـ محمد عبد الوهاب، اللي رجعهاله طويلة شوية، فقال له: "معلش يا رامي"، يدوب نطق الياء في "رامي"، وراح واقع. الكل جري عليه، بس كان سهم الله نفذ.

إيهاب علي، طبيب الفريق، بص بعينه لأحمد ناجي مدرب حراس المرمى، اللي فهم الموضوع، بس ما قالوش لحد من اللاعبة، وجات عربية الإسعاف، وراح لمثواه الأخير.

مكنش ساعتها كمل 23 سنة، وعمره في الملاعب يدوب 3 سنين، ومحصلش سنتين مع الفريق، بس كان واحد من نجوم النادي الأهلي، وأحد أركانه، وصانعي تاريخه العريض.

بداية عبد الوهاب كانت في أشبال الزمالك، قعد هناك أربع شهور، بس ما وقعش للنادي، راح لعب في الألومنيوم، نجح حمادي، لأنه كان ضامن يلعب في الفريق الأول. وفعلاً اتشاف من الألومنيوم، وضمه حسن شحاتة لمنتخب الشباب.

منتخبات الشباب محدش بياخد باله منها غير لما يلعبوا بطولات كبيرة خارجية، ومش كل الفريق بيبقوا نجوم، بس محرزي الأهداف وحراس المرمى في الغالب. علشان كده، الجمهور عرف عبد الوهاب من بطولة كأس الأمم الأفريقية 2003 في بوركينا فاسو، واللي كانت مؤهلة لكأس العالم في الإمارات.

مش بس المنتخب حصد البطولة في فوز مثير على كوت ديفوار 3/4 في النهائي، ومش بس وصلنا للموندリアル، لكن كمان عبد الوهاب سجل هدف الفوز، والهدف الوحيد لمصر في قبل النهائي، من فاول مميز عدينا بيه مالي.

بعد البطولة دي، وبعد المونديال، عبد الوهاب ساب مصر، واحترف في الإمارات، والنادي الإماراتي أعاره لإنبي موسم، ورجع للإمارات، فالأهلي خده إعارة بس لمدة موسمين.

الموسم الأول ليه مع الأهلي، 2004/2005 كان فيه غزال في الناحية الشمال اسمه جيلبرتو، فكانت فرصة عبد الوهاب صعبة، مع إنه كان أساسي في المنتخب، بس المنتخب مفيهوش جيلبرتو، برضه هو كان صغير في السن، والمستقبل كان قدامه.

الموسم الثاني بدأ برضه بنفس الوضع، بس في نص الموسم، الأهلي كان يلعب نهائي أفريقيا، قدام النجم الساحلي، وجيلبرتو أصيب في أول ربع ساعة، ونزل عبد الوهاب، وما طلعلش تاني، لأنه بدع في الماتش، ورفع عرضية حرير لأسامة حسني سجل الهدف اللي حسم البطولة.

في نهاية الموسم، الظفرة (ناديه الإماراتي) قرر يرجعه، ورفض يمد الإعارة، أو يبيعه للأهلي، وحصلت أزمة بس الأهلي حسمها لصالحه، وخلي البيع نهائي، والكلام ده قبل وفاته بحاجة بسيطة.

عبد الوهاب لعب مع الأهلي في الدوري 26 مباراة، اتعادل في ماتش واحد قدام الزمالك، وفاز في الـ 25 ماتش الباقيين، تصورا ولعب خمسة في الكاس، وكسبهم كلهم، ولعب تسع مباريات في أفريقيا. وواحدة سوبر أفريقيا، وواحدة سوبر محلي، وجاب أربع إخوان أشهرهم في الإسماعيلي أربعة صفر في الإسماعيلية.



رحيله فعلاً كان صدمة للجمهور للجمهور واللاعبيّة، وخذنا  
بعدها وقت كل ما لاعب يقع، يقع معاه قلب الجمهور، وللأسف  
الشديد، كان فيه لاعبيّة تستخدم الحكاية دي لكسب التعاطف.

في ماتش الصفاقسي، أول ماتش بعد الرحيل، الأهلي كسب  
1/2، اللي جاب الجون الأول أبو تريكة، وبدال ما يحتفل بكى،  
وبكى معاه الاستاد كله، ربنا يرحمك يا عبد الوهاب ويرحم الجميع.

## مصطفى كامل

### لو لم أكن مصرياً

من ساعة ما وعينا ع الدنيا وإحنا نعرف إن زعماء مصر الوطنيين قبل ثورة يوليو هم: أحمد عرابي ومصطفى كامل وسعد زغلول، هم ما قالوا لناش يعني إيه زعيم؟ يعني بيشتغل إيه بالظبط؟ وإيشمعنى دول بالذات؟ بس يعني إحنا برضه ما سألناش.

بعد شوية الواحد بدأ يدرك حاجات، ويعرف معلومات، ويفرق باين ده وده، لكن المعلومة المدهشة اللي خدت بالي منها إن مصطفى كامل لو لم أكن مصرياً، ولا يأس مع الحياة، كان شاب مصري اتخطف بدري، ومات هو يدوب عنده 34 سنة، بس الجماعة القدام دول كانوا بيربوا شبات كبيرة، ويتصوروا وهم مكشرين، فبيانوا أكبر من عمرهم.

طبعًا مصطفى كامل عايز قصص وحواديت وحكاوي كثير، بس هنا هنهتم بكام حاجة ننور بيهم فوانيس، منها إنه مش من مواليد القاهرة، بالعكس، كان من قرية في مركز بسيون محافظة الغربية، ودي حاجة غريبة، معظم اللي بنوا مصر ثقافيًا وفنيًا وعلميًا مكنوش من القاهرة، بس ما علينا.

مصطفى كامل طبعًا راجل وطني، وكان عايز الخير لبلده اللي هي مصر، بس ده ما يمنعش إنه فكريًا فيه حاجة مش مطبوعة، يعني مثلاً فكرته مكتتش استقلال مصر بالظبط، هي فكرته إنه ضد الاحتلال الإنجليزي، لأنه إنجليزي مش لأنه احتلال، وفي سبيل كده كان عادي يتحالف مع الحديوي ضد كرومر، وإنه يدعو إلى "عالم إسلامي" تبقى مصر جزء منه.

كمان مصطفى كامل كانت عينه على فرنسا، وكان متخيل إن الحركة الثقافية الفرنسية ممكن تساعد مصر في قضيتها ضد إنجلترا، علشان كده هو راح درس في فرنسا، وكان بيخاطب صحفيين هناك بشأن مصر، وكان فيه صحيفة اسمها جوليت آدم له بيها صلة قوية، وبنتشر له مقالات في مجلتها، وهكذا.

اللي بيساعد على الارتباك ده إن كامل مكنش عنده مشروع أيديولوجي واضح، وأغلب كلامه خطب حماسية كان بيقلوها في الخطب اللي بتتظمها الجمعيات الوطنية في مصر أو في فرنسا.

بس ده مش معناه إن الراجل كان بلح، هي الحكاية بس إن الموضوع خد أكبر من حجمه شوية، لكن هو له أدوار مش ممكن نحذفها من كتاب التاريخ، زي حماسه وقت حادثة دنشواي، وتعريف العالم بالجريمة. كمان تأسيسه لجريدة اللواء، واكتشاف كتاب مهمين منهم محمد يونس القاضي مؤلف النشيد الوطني، وهو اللي أوحى بدخول النشيد:

بلادي بلادي بلادي

لك حي وفؤادي

بس الزغلول الكبير كان جامعة القاهرة.

جامعة القاهرة، أو الجامعة المصرية اتعملت بالتبرعات، اللي قدمها أعيان مصر وقتها في إطار الجهود للاستقلال عن بريطانيا، إنما الدعوة الأساسية صدرت من مصطفى كامل، ومن خلال خطبه ومقالاته اللي كان بيقراها كل مصري يعرف يفك الخط وقتها، مش بس ساهم في جمع المبلغ المطلوب، لكن كمان نظم عملية إنشاء الجامعة، والاجتماعات بين المؤسسين.

اتوفى مصطفى كامل سنة 1908، لأنه كان مريض بالسل من صغره، ووقتها كان مرض مالوش علاج، وقصته اتعملت فيلم إخراج أحمد بدرخان، والممثل اللي عمل دوره اسمه أنور أحمد، كان صحفي

ماسك باب "العواطف" في مجلة حواء، ومالوش أذوار تانية غير الفيلم  
٥٥.

اللطيف إن الفيلم لما اتعمل، نسيوا يكتبوا اسم مؤلف القصة،  
فتحي رضوان، وعقبال ما الفيلم اتعرض فعلاً 1952، كانت الثورة  
قامت، فراحوا عاملين تنويه إنهم محطوش اسم كاتب القصة نتيجة  
القمع فالعهد البائد، مع إنهم عادي كاتين أسماء الناس اللي عملوا  
السيناريو والحوار: أنور أحمد ويوسف جوهر وأحمد بدرخان.

ربنا يرحمهم كلهم بقي ويرحم الجميع.

## هاشم الرفاعي

### سرقوه الإخوان

مع إنه عاش 24 سنة فقط لا غير، بس ساب وراه جدل وتأثير وبصمة لسه مستمرين يمكن لحد دلوقتي.

اتولد سنة 1935 في أنشاص، محافظة الشرقية، ودرس لحد الثانوية في الأزهر، ودخل كلية دار العلوم، لحد هنا عادي، اللي مش عادي إنه كان شاعر كلاسيكي من الطراز الأول، متمكن من أدوات اللون ده من الشعر، وكمان كانت عيلته في بلدهم قوية، وأهله ناس مهمين، وده خلاه يدخل دايرة الشهرة بسرعة.

سنة 1959، دخل خنافة، فيه خلاف حوالين أسبابها وتفصيلها، بس غالبا ليها علاقة بانتخابات محلية في بلدهم، واتقتل في الخنافة دي. ومن هنا بدأت الأسطورة.

الفكرة هنا كانت: هو كان بيأيد مين: الدولة ولا الإخوان؟ واضح إن مصر من كثير وهي في الموضوع ده، وشكلها هتفضل كثير كمان.

المهم، هاشم كان ليه أخ قريب من الإخوان، فبدأ يسوق لأخوه المتوفي باعتباره مناضل إخواني ضد بطش عبد الناصر، وساعده في ده أفضل قصيدة كتبها المرحوم، وهي قصيدة رسالة في ليلة التنفيذ.

القصيدة بتحكي عن شاب محكوم عليه بالإعدام، وهينقلوا الإعدام ده الصبح، فهو بيكتب رسالة لأبوه، يودعه فيها، ويقول له: إنه راح ظلما نتيجة البطش (وهنقول حكايتها في الآخر).

القصيدة دي خدوها الإخوان، مع مجموعة قصايد تانية حماسية، واعتبروها ديوان هاشم الرفاعي الشهيد الإسلامي، واستخدموها عقود طويلة، ولسه بيستخدموها لتجنيد الطلاب الصغرين، خصوصاً في كلية دار العلوم اللي هي مفرخة الأصولية الإسلامية في الجامعة.

ونضيف على كده إن واحد زي د. الطاهر أحمد مكى، اللي هو يساري تجمعي، يتبنى الرواية دي، ويختار القصيدة دي ضمن مختاراته من "الشعر العربي المعاصر" في كتاب ليه كان مهم جداً أيامنا، ويديها عنوان: "شهداء الإخوان المسلمين" خبط لرق.

الدولة من ناحية ثانية، اعتبرت الشاعر شاعرها، وخذت كل أعماله، اللي تفهم منها إنه أبعد ما يكون عن الإخوان، وعن الإسلاميين عموماً، لدرجة إنه فيه قصايد في مدح السجائر!

الأعمال دي اتطبعت في الدولة في ديوان ضخمة، متصدر بصورة الشاعر وهو يسلم على عبد الناصر شخصياً. والديوان مليون قصايد كتبها لمساندة الدولة، ومنها قصيدة كانت مقررة على طلاب المدارس، وكنا بنقراها في الإذاعة المدرسية كل يومين.

والواقع إن الواحد ما يقدرش قوي يجزم إذا كان الشاعر مساند للدولة ولا لأ، لكن نقدر بسهولة نكتشف إن الإخوان المسلمين كانوا مدلسين كذابين في الملف ده، ليه؟ ببساطة لأن الشاعر كان على خصومة شخصية مع الجماعة، وشتهمهم في أكثر من قصيدة، منهم الكلام ده:

رھط من الأطفال والصبيان

قالوا عليهم شعبة الإخوان

شاهت وجوه القوم، هذي دعوة

للجيب لا لله والقرآن

هم عصبة للشر نعلم أنها

قامت على واهٍ من الأركان



من كل مغرور يظن بأنه

ملك البديع وسيد الأزمان

تلك الجماعة قد تنبأنا لها

بألهدم يوم إقامة البنيان

الحاجة الثانية المهمة، التي تكشف تدليس الإخوان، إن القصيدة الأشهر: "رسالة في ليلة التنفيذ" أصلاً مالهش علاقة بالإخوان من قريب أو من بعيد، دي قصيدة كتبها تحية لشهداء الجزائر، وقت ما كانت مصر بستساند الثورة الجزائرية، وده مش استنتاج، ده منطوق القصيدة في أكثر من بيت، أوضحها:

لِيَكُنْ عَزَاوُكَ أَنَّ هَذَا الْحَبْلَ مَا

صَنَعْتُهُ فِي هَذِي الرُّبُوعِ يَدَانِ

نَسْجُوهُ فِي بَلَدٍ يَشْعُ حَصَارَةً

وَقَضَاءُ مِنْهُ مَشَاعِلُ الْعِرْفَانِ

أَوْ هَكَذَا زَعَمُوا! وَجِيءَ بِهِ إِلَى

بَلَدِي الْجَرِيحِ عَلَى يَدِ الْأَعْوَانِ

وتعبر "أعوان" الاستعمار ده تعبير ناصري بامتياز.

ربنا يرحمك يا هاشم، ويرحم الجميع.

## يحيى الطاهر عبد الله

### الطوق والإسورة

اتولد قبل أمل دنقل بستين، واتوفى قبله بستين، يحيى الطاهر عبد الله، الضلع الثالث في مثلث بيجمعه مع أمل والأبنودي. المثلث اللي نزح من قبلي في الستينات بأحلام عريضة، ما اتحققش منها حاجة على المستوى الشخصي (ولا حتى الأبنودي) بس عملوا أكثر من المتوقع من حيث المجد الأدبي (بما فيهم الأبنودي).

يحيى كان من الأقصر، وسمع عن الأبنودي وأمل في أواخر الخمسينات، هم كانوا بدأوا يكتبوا ويتعرفوا في محيط جنوب الصعيد، فاستقال من شغله وراح قنا عاش في البيت مع الأبنودي، فبقوا شلة مش بس ميدعين لكن كمان مثقفين من الطراز الرفيع، وقرأوا من الدرجة الأولى.

أواخر الخمسينات كان عنده يدوب عشرين سنة، بس هو كان اتعلم، وخذ دبلوم الزراعة (ودي كانت حاجة كبيرة وقتها في مصر عموماً، والصعيد خصوصاً) واتوظف كمان، لكنه ساب كل ده وراح للأدب والثقافة.

1962، الأبودي وأمل سابوا الصعيد، الأبودي راح مصر، وأمل راح إسكندرية، وسابوا يحيى في قنا، بس هو حصلهم بعد كده بشوية، وسكن مع الأبودي في بولاق الدكرور، وبدأ يتعرف ككاتب قصة قصيرة.

القصص اللي كان بيكتبها يحيى كانت في عالم خاص، "الحدوتة" فيها مش كل حاجة، ومكنش ليها علاقة بعالم السياسة، ومفيهاش مباشرة، يمكن علشان كده استدعاؤه مش زي أمل وعبد الرحمن، هو موجود أكثر وسط النخبة، والمهتمين بالأدب والثقافة، مش بالشأن العام والعمل الجماهيري.

يحيى كان موجود دائماً على المقاهي الأدبية، خصوصاً مقهى "ريش"، اللي كانت رمز لـ حاجات كتير إيجابية، وحاجات تانية سلبية، وكلنا عارفين إن نجم مثلاً له شعر في هجاء ريش واللي بيقتعدوا عليها، كمان نجيب سرور عمل كده في بروتوكولات حكماء مقهى ريش.

كان حضور يحيى ناتج من قصصه، اللي كان بـ يحفظها غيبا،  
ويقولها كأفها شعر، فـ كانت أشبه بـ فكرة الحكواتي، هو كمان  
كان مشغول بالسير الشعبية، وعنده خطط لاستلهاها في أعمال.

اللي قدم يحيى على نطاق أوسع كان يوسف إدريس، والجمل في  
جرنان المساء، وبعد شوية بقي يحيى واحد من أهم كتاب الحركة  
الثقافية في أواخر الستينات وطول فترة السبعينات، وكان صديق  
مقرب للدكاترة جابر عصفور (وزير الثقافة لحظة كتابة السطور دي)  
والعظيم عبد المحسن طه بدر، وعبد المنعم تليمة، والتجوز أخت  
الدكتور تليمة وخاف منها بنتين وولد، والولد اتوفى صغير، والبنتين  
معروف منه أسماء يحيى الطاهر، اللي انشغلت برضه بالفن والثقافة.

في أبريل 1981، في طريق الواحات، اتعرض يحيى لحادثة أليمة،  
واتوفى، وكان أول صدمة من المجموعة دي، ولما أمل كتب آخر  
قصايد "الجنوبي" كتب مقطع منها لأسماء، كان من أشهر وأجل  
مقاطع الرثاء

ليت أسماء تعرف أن أباه صعد

لم يمت

هل يموت الذي كان "يحيى"

كان الحياة أبد

وكان الشراب نفد

وكان البنات الجميلات يمشين فوق الزبد

عاش منتصبا

بينما ينحني القلب يبحث عما فقد

مش بس أمل اللي رثى يحى، لكن دي كانت الأبرز.

بعد وفاة يحى، قرر المخرج خيرى بشارة إنه يعمل فيلم عن رواية  
لـيحى، وكان فيلم الطوق والإسورة، وشارك الأبنودى فى كتابة  
السيناريو مع خيرى، والفيلم بقى واحد من الكلاسيكيات بالنسبة  
للمثقفين، مع إنه، وكما هو متوقع، ما انتشرش على المستوى  
ال جماهيري، لأن الفيلم كان، زي معظم شغل يحى، مش مشغول  
بفكرة الأعلى مبيعًا، والأكثر إيرادات والبيست سيلر.

ربنا يرحمك يا يحى ويرحم الجميع.



كلام أغاني  
الحب وأشياء أخرى





## في البداية

إحنا المصريين، وحسب سلو بلدنا، ما نحبش المزيكا "الخاف".  
والمزيكا "الخاف"، أعزك الله، هي المزيكا اللي بتسمع من غير  
كلمات/ أشعار، الغُنا عندنا شرط من شروط التمزج من الكلام.  
طبعا فيه ناس اشتغلت مزيكا من غير غنا، بس دول أد إيه؟ أد إيه  
نسبتهم، وأد إيه انتشارهم؟

مثلا، كثير من الناس اللي بيدربوا العازفين والآلاتية بيضطروا  
يحطوا كلمات على اللزمات والمردات الموسيقية بين الكلام، علشان  
المتدربين يعرفوا يحفظوه، ولقباحة الكلام المعتاد في المواقف اللي زي  
دي مش هنعرف نضرب أمثلة، ولا ليه؟ ما تيجي ننقي حاجة خفيفة،  
ونحط نقط مكان الكلام القبيح وكده.

في غنوة البيض الأمانة بتاعة عبد الغني السيد، الكلمات بتقول:

البيض الأمانة

جنوا وظلموني

تارا رارا

والسمر العذارى

يا ريت ينصفوني

بين البيت الأول: البيض الأمانة، جنوا وظلموني. والبيت الثاني:  
السمر العذارى يا ريت ينصفوني، فيه جملة جملة موسيقية، تارا را را.  
فيجي مدرب يدرّب فرقة على عزفها، فيحط كلمة: " .. أمك"،  
علشان يسهل ع العازفين حفظها. حاول كده تغنيها بعد الإضافة.

ورغم كده يا معلم، تلاقينا برضه مش بندّي الكلام حقّه، إحنا  
عايزينه آه، بس عايزينه في الأغلب سنيد للبطل اللي هو المزيكا، أو  
إن جيت للحق المطرب، وتعالى ناخذ مثال كده، البيض الأمانة  
نفسها، أعتقد إن 99% منا مش عارفين البيض الأمانة عملوا إيه؟  
ولا حتى اهتموا، وجرب كده دندننا قدام حد صاحبك، هتلاقيه  
دندن معاك، وقف واسأله: البيض الأمانة عملوا إيه؟

هتلاقي فجأة طلع لك شفيق صغير، وقال لك: إيه؟

ولو ناصح وسريع البديهة، هيقول لك حاجات غريبة، زي مثلاً:  
البيض الأمانة "كانوا وظلموني".

فيه أمثلة كتير كتير على ده، مش عايز أتابعها لأني أظن الفكرة  
واضحة، بس فعلاً حجم إهمال الكلمات ومعانيها شيء لا يصدق  
عقل.

لكن في الحقيقة، الواحد مش يلوم الناس، ومش ضروري كل البشر يبقوا مهتمين باللي إنت مهتم بيه، وأكيد مثلاً آليات الحركة على المسرح قم المسرحيين، بس إنت مش مضطر تهم بيها زيه، كل ده مفهوم، بس برضه إيه اللي يمنع إننا نبدأ ناخد بالناس شوية من اللي بنسمعه.

عدم تركيزنا مع الكلام اللي بنسمعه، اللي بيشكل وجداننا سواء بوعي منا أو من غير وعي، خلأ فيه كوارث بيرتكبها صناع الأغاني جيل ورا جيل، خلت الوضع النهائي هو ضعف قدرتنا على تحليل اللي بنسمعه بشكل عام، وهو ده السبب المباشر في رأيي، لانتشار أي هري في أي وقت من غير أي تدقيق.

مش عايز أكون قاسي في حكمي، أصلأ مش عايز أصدر أحكام، إحنا ضيعنا وقت كثير بتتريق على الناس وشغلها، وكنا غلط فيما اعتقد، السليم بالنسبة لي هو تجاوز التقييم، ومحاولة التحليل، كل واحد يحلل الحاجات اللي يفهم فيها، ما يكونش مشغول بأنه يقول لك: ده حلو وده وحش، لأن دي مسألة نسبية، لكن يمكك كشاف كده، ويحاول يقول لنا: دي اتعملت ازاي، ويفكك عناصرها، وفي الآخر، اللي يحب حاجة يحبها، واللي ما يحبش ما يحبش.

علشان كده، المساحة دي، هنتكلم فيها عن كلمات الأغاني المصرية، يالا بينا، وربنا يقدرنا على فعل الخير.

## الأبنودي .. المغنواتي

ما ينفعش الأبنودي يبقى في مقال واحد، أكيد محتاج عشرة خمستاشر عشرين مقال. وفي تقديري إن تجربته في كتابة الأغنية هي "الأهم" في تاريخ الأغنية المصرية. الرجل غناله عبد الحليم ورشدي وحسن الأسمر ونجاة ونجاح سلام ومحمد منير ونجاة وفايزة وعدوية والشيخ إمام وعلي الحجار ومنى عبد الغني ووائل جيسار ومحمد حمام وسمية قيصر ونادية مصطفى و... فاضي؟ القائمة لسه طويلة.

كثر المطربين اللي غنوا للأبنودي مش هو الموضوع، لكن تنوع القائمة دي هو المدهش، تنوعهم من ناحية الأجيال، من فايزة أحمد لحد وائل جيسار ولسه. وتنوعها من حيث اللون، من نجاة لعديوية، وتنوعها من حيث الموضوعات، من أول "يا أعز الأحباب دبت وقلبي داب" لحد "بره الشبابيك غيوم"، وتنوعها من حيث القالب: غنوة،

أوبريت، تتر مسلسل، هتاف ف مظاهرة. حتى السياسة خدها من أول ضحكة المساجين لحد الاحتفال بعيد الشرطة.

طيب وهي دي حاجة كويسة؟

مش عارف دي حاجة كويسة ولا لا، بس هي حاجة مهمة جداً، عشان كده باقول الأهم، مش الأجل ولا الأعظم ولا الأفضل. مع إنه كتب حاجات باشوفها في منتهى الإبداع، بس كمان كتب حاجات في منتهى الركاكة، وتقدر تقول إنه ينطبق عليه كلام نجم: عمل حاجات معجزة وحاجات كثير خابت.

هنكتب كثير عن الأبنودي، بس دلوقتي خيلنا نتكلم عن بدايته في عالم الأغنية، وبعدين نبقى نشوف موضوع موضوع.

قصة بداية الأبنودي سمعتها وقريتها من يبجي حوالي عشر مصادر، بس اللطيف إني قريتها منسوبة للأبنودي نفسه مرتين، وسمعتها منه بنفسه مرة في حوار تلفزيوني، وفيه اختلافات واضحة في التلات مرات، لكن هاسجل هنا المشترك بين الحكايات دي:

البداية من عند صلاح جاهين، أيوه، جاهين هو اللي قدم الأبنودي، نشر له حاجة، ووداها الإذاعة وأصر على إن الراجل ده يكتب أغاني في الراديو، زي كده محمد فوزي ما قدم بليغ حمدي، الكبير بس هو اللي يعمل كده، وما اعتقدش فيه أكبر من جاهين.

الأبنودي نفسه سمع أول غنوة ليه (كانت عن مكافحة دود القطن) زي أي حد، غنتها مطربة اسمها فاطمة علي.

جاهين قدم الأبنودي لمحمد حسن الشجاعي اللي كان مستشار الإذاعة في موضوع الأغاني والموسيقى، وكانت كلمته هي الأولى والأخيرة في الاختيارات. الشجاعي خد منه أغاني، لكن العقدة بشنيطة كانت في غنوة "تحت السجر يا هبية".

الكلمات كانت معقربة جدًا، لأن قاموس الغنوة المصرية بصفة عامة كان بيكشف بقاله ييجي ثلاثين سنة، بعد رحابة بديع خيرى مع سيد درويش، جه جيل كان حريص على إن كلمات الأغاني تبقى ف حنة صغيرة، وده اللي اعترض عليه بيرم التونسي في غنوته الشهيرة:

يا اهل المغنى دماغنا وجعنا دقيقة سكوت لله

واللي كتبها أصلًا ينتقد كلمات أغاني عيد وهاب، يا وابور قل لي، وبلبل حيران، ولا مش أنا اللي أبكي، وبركز بيرم قوي في الغنوة على حنة فقر القاموس دي:

يا اهل المغنى دماغنا وجعنا

دقيقه سكوت لله

داحنا شبعنا كلام ماله معنى

ياليل وياعين وياآه

طلعت موضة غصون وبلا بل  
شابط فيها حزين  
شاكي وباكي وقال موش عارف  
يشكي ويبكي لمن  
واللي جابت له الداء والكافيه  
طرشة ماهش سامعاه

يا اهل المغنى دماغنا وجعنا  
دقيقه سكوت لله  
ردى عليه ياطيور بينادى  
وارمى له الجناجين  
وانت كمان يابور الوادى  
قل له رايح على فين  
قل له اياك يرتاح يابابوره  
ويريحنا معاه

يا اهل المغنى دماغنا وجعنا  
دقيقه سكوت الله

كل جدع فرحان بشبابه  
يقول فى عنيّ دموع  
ياللى جلبق شقاه وعذابه  
حلّى لنا الموضوع  
طالع نازل يلقي عواذل  
واقفة بتستاه

يا اهل المغنى دماغنا وجعنا  
دقيقه سكوت الله  
وينجي بقى لأهم مقطع:  
حافضين عشره اتناشر كلمه  
نقل من الجورنال  
شوق وحنين وأمل وأمانى





مفيش ملحن اتحمس للغنوة، منير مراد رفضها، الموجي طبعًا رفضها، ملحنين أقل شهرة كثير رفضوها، لحد ما وقعت في إيد ملك الروقان والمزاج، الراجل اللي أم كلثوم اتصلت بيه (والعهدة ع الراوي) وقالت له: "يا راجل يا علق"، لما لحن "سحب رمشه" لمحمد قنديل.

الكلام راح لعبد العظيم عبد الحق، ضمن كلام كثير، فقال: هو ده.

اللي ما يعرفش عبد العظيم عبد الحق أقول له إنه الممثل اللي عمل مشهد الأتوبيس العظيم في فيلم الإرهاب والكباب.

المهم، عبد العظيم لحن الغنوة، فضل مين هيغنيها؟ مع ملاحظة إن كل ده كان بيعجرى علشان إنتاج غنوة زيبا زي أي غنوة، كل ميزتها بالنسبة لصناع القرار إن اللجنة اعتمدتها، بناء على رأي جاهين، فالغنوة لازم تاخذ دورها وتتغنى، محدش يعني كان بيعمل حاجة هتقلب ميزان الغنوة (أو هتعدله، حسب وضعك).

طيب، نروح للراجل اللي غنى "قولوا لمأذون البلد"، ودي غنوة ليها قصة لطيفة نقولها بعدين، تفاصيل كثير حصلت، مختلف عليها، بس المشترك إن رشدي غنى الغنوة على مضض.

رغم إن الغنوة دي رقم 4 في تاريخ الأبنودي، ورغم إن الغنوة رقم 3 هي غنوة بقت معروفة جدًا بعدين (بالسلامة يا جيبى

بالسلامة، اللي كانت بتيجي كل يوم الساعة 8 إلا تلت وكنا بنعرف أول ما تيجي إن باب المدرسة قفل، وإننا هنتعاقب). رغم ده، فـ "تحت السجر" كانت تحويلة مهمة في كلام الأغاني هيبان أثرها بعدها بخمشر سنة على الأقل.

والغنوة دي هي اللي جابت غنوة "عدوية"، اللي كانت في تاريخ الغنا ثورة أو انقلاب (ما أعتقدش تفرق)

## اسمها "عدوية"

"عدوية" دي شغالة عند عبد العظيم عبد الحق، مين لسه ما يعرفش المعلومة دي؟

الحكاية دي مشهورة قوي، لما الأبنودي بدأ يروح عند عظمة (دلع عبد العظيم) كان فيه بنت بتشتغل عنده، الخال سألها: اسمك إيه؟ قالت له: عدوية. فرد عليها: اسمك عدوية يا صبية وعيونك شط. وراح كاتب الغنوة.

كان المفروض إن الغنوة دي تكون الثانية بين الثلاثي بتاع وهيبة: رشدي وعظمة والأبنودي، لكن ده ما حصلش، لأن حاجات كتيرة دخلت ع الخط، إيه بقى؟ نبدأ بعظمة نفسه، حسب معرفتي بالراجل ده، من خلال حكايات معاصريه، فهو كان حريص جداً ما يدخلش منافسات، كان موظف كبير، ومش محتاج فلوس الفن،

وعنده شقة صغيرة وعربية أصغر بيعاملها كأنها من العيلة، ومالوش في جو أهل الفن.

عظمة لقي سكة رشدي بتوسع، والاهتمام بيه بيكبر، والحكاية دخلت فسي الغميق، فقال للأبنودي: باقول لك إيه يا عبد الرحمن، البت مخايلاني (مزاولاني) وانا مش عارف ألحن الغنوة، شوفوا حد غيري.

في نفس ذات النفس، كان بليغ حمدي بيستعد يعمل شركة زي شركة فوزي اللي اتأمت، وزى بتاعة عبد الوهاب وعبد حليم اللي ما اتأمتش، وكان داخل معاه فيها صلاح عرام شريك (الشركة ما اتعملتش على حد علمي)

المهم، ليه بليغ كان عايز يعمل شركة؟ لأنه كان شايف إن مفيش غنوة "مصرية" من بعد سيد درويش، فكان عايز يعمل أغاني شعبية تستوعب فكرته عن مصرية الغنوة، وده الوقت اللي اتعرف فيه على محمد حمزة وبدأ فعلا يفكر في اللي هيقدمه.

بليغ لما سمع "تحت السجر" شاف إن الأبنودي عنده حاجات، فطلب من الشجاعي يعرفهم على بعض، وقد كان. فيه رواية بتقول إنهم اتقابلوا عند الشجاعي صدفة، بس تفتكر هتفرق؟

لما عظمة اعتذر عن الغنوة. الأبنودي مكذبش خبر وطلع بيها على بليغ، راح بليغ أقنع رشدي ينتجوها شرك لحساب شركة

الأسطوانات اللي بيعملها، وادوا الأبودوي 15 جنيه، وسجلوها في ستوديو في العتبة (يعني مش في الإذاعة) بس الغنوة فالآخر ما طلعتش من الشركة الخاصة بتاعة بليغ، لأن عبد اللطيف الحو مسئول صوت القاهرة كان حاضر التسجيل فاشترها منهم، وبكده صوت القاهرة بقت مسئولة عن التسويق، ولأن صوت القاهرة بتاعة الدولة، حطت رشدي نجم حفلة أضواء المدينة اللي جاية، وأضواء المدينة دي حدوتة كبيرة، راجع فيلم إشاعة حب، كانت حفلات بتلف المحافطات، والدنيا كانت بتقلب لها.

بالصدفة، كانت حفلة أضواء المدينة في سوهاج، وغنى رشدي الغنوة هناك، وقلبت الدنيا فعلياً، وكان لأول مرة من وقت ظهور حلیم، حد يحقق مبيعات أكثر منه، والمشهد اللي عمله شريف عرفة في فيلم حلیم عن الغنوة دي، حسب اعتقادي، أدق تعبير عن الحالة اللي عملتها الغنوة.

طب ليه "عدوية" مش "تحت السجر"؟

متهيألي فيه كذا سبب، لكن أغلبهم ممكن يدخل تحت عنوان عريض اسمه الاحتراف.

أولا، عم عظمة جامل بديع، لكن تلحينه لغنوة "تحت السجر" مكش داخل في سياق أكبر، أو مشروع أشمل، كلام عجبه عمل له لحن ع المزاج، العمل نجح للسبب ده، لكن تأسيس سكة أو طريقة شيء مختلف تماماً.

ثانيا، عدم تدخل عظمة في كلام الغنوة، خلاها غنوة خاصة،  
محتاجة مزاج خاص يغنيها، الأبودي كتب فيها تركيبات صعبة على  
الودن وقتها، وكان يحاول يجود في كل سطر

الليل بينعس

دي برتقانة ولا ده قلبي

وحاجات كده

لكن بليغ، اهتم جدًا ببنا الغنوة، بدأها بموال، ولما الأبودي كتب  
الموال قص منه، واكتفى بالحنة بتاعة صياد، وعمل لها سنو واضح،  
وكان فيه سطور كثيرة لخدمة اللحن، بليغ مكشش بس صانع اللحن،  
كان كمان سايق الكلام، وده اللي هيخليه يعتمد أكثر على حمزة فيما  
بعد، الأبودي ومرسي وحسين ومأمون طبعا كانوا بيضايقوا من  
التدخلات الكثير في الكلام. لكن التدخلات دي كانت بتخدم  
جماهيرية العمل.

ثانيا،

صناعة الغنوة نفسها، ودخول شركات اتعملت وشركات ما  
اتعملتش، وخروجها نسبيا من بيروقراطية الإذاعة، والاهتمام بطريقة  
تقديمها وتسويقها، وطرحها في اسطوانات، كل ده كان فارق مش  
بس في الترويج للغنوة، لكن ف صناعتها كمان، دخولك المنافسة  
بيخليك شايف الصورة ككل، وعارف انت بتستهدف مين وإيه؟

ثالثاً، جرعة الخروج من قاموس الكلمات الضيق اللي اتكلمنا عنه المرة اللي فاتت كانت أخف، مش بس في عدد المفردات الجديدة، لكن كمان في طريقة تقديمها، مثلاً "أتشال وأتحط" صحيح عمرك ما هتسمعها في غنوة لحليم حتى لو بليغ اتشال واتحط، لكنها في نفس ذات انجال، مفيهاش التركيب المجازي في جمل زي الليل بينعس، البدر يهمس للسنابل، يرقص الجلاية وهكذا أشياء.

وإجمالاً قاموس بهية أكثر شاعرية (بمفهوم الشعر في الستينات)، وبالتالي كان مصدر نجاحه إنه غريب، لكن قاموس عدوية أكثر بساطة.

على أي حال، نجاح عدوية هو اللي اعتمد الأبنودي، وده مخلاش السكة مفروشة قدامه، بالعكس خلق له صعوبات قدر يواجهها، لحد ما بقى الخال.



## على "اسم مصر"

يعني!

الواحد ممكن يكتب إزاي عن كلام الأغاني في الجو ده؟ بس خيلنا  
نفضفض كده عن "اسم مصر".

والحكاية بتبدأ من عمارة اسمها "عمارة الشركة"، موجودة في  
شبرا، وما تعرفش السر في شبرا ولا في العمارة دي تحديدًا، ولا في  
السنة اللي اتولد فيها صلاح جاهين وبلغ حمدي في ذات نفس الزمان  
والمكان.

جاهين وبلغ هم أكثر اتنين انشغلوا بـ "مصر"، انشغلوا بطريقة  
تحس معاها لأول وهلة إنها حاجة كده حنجرية سينتمتالية شيفونية  
أو أي حاجة آخرها "سية" من اللي بيكتبوها في المقالات، بس لما  
تدقق، جايز تشوف زبي كده إن الاتنين دول بالذات عملوا حاجة

مهمة جدًا مش عايز أوصفها، لأن الأوصاف مش مهمة، المهم هم عملوا إيه.

سنة 1958، اتحدت مصر وسوريا في مشروع ما استمرش أكثر من ثلاث سنين، تقييما للوحدة والانفصال مش مهم، المهم إن "اسم مصر" اختفى في العملية دي، بقى اسمها "الجمهورية العربية المتحدة"، وحتى بعد الانفصال ما رجعت اسمها زي ما هو، بس برضه دي حاجة مش مهمة، المهم بالنسبة لنا دلوقتي الأغاني.

صدرت التعليمات، ما اعرفش من مين، إن مفيش مصر في الأغاني، وعملت جهود كبيرة إني ألاقى اسم مصر في أي أغنية من طوفان الأغاني اللي اتكتبت في الستينيات، واللي تعارفنا على تسميتها: أغاني "وطنية"، وما لقيتش، لو تعرف غنوة قل لي ينوبك ثواب.

حق غنوة زي بالأحضان، اللي كتبها جاهين، هتفهم إنها لمصر، بس ركز كده، مفياش أي مصر: يا حبيبتي، يا أمي، يا بلادي، يا غنوة ف دمي، يا سواعد عربية، يا نفوس حرة أبية، إلخ إلخ.

جاهين وبلغ، خصوصا بعد النكسة، اهتموا جدا بالقصة دي، وحاجة غريبة إن شغلهم مع بعض نادر جدا، وكنت كتبت قصة قبل كده عن حكاية عدم تعاون جاهين مع بليغ، انتهت بإن بليغ قال لجاهين: شعرك أعظم من إنه يتغنى! بس الحكاية دي مش وقتها، المهم

إنهم اهتموا بحكاية اسم مصر اللي اختفى دي، بس كل واحد بطريقته. بليغ خاضها معركة، وجاهين قضاها تأمل.

من ناحية بليغ، فضل يحارب ويحارب ويحارب، لحد ما قدر يقنع وجدي الحكيم، المستول الإذاعي، إنه يعمل غنوة اسمها: "يا حبيبي يا مصر"، وفعلاً وجدي كتب تأشيرة: تذاع على مسئوليتي الشخصية.

كان طبعي إن بليغ في العركة دي ما يقاش مهتم بكتابة عميقة، ولا جميلة، ولا فنية ولا دبالو. المناسب هنا كلمات سينمائية جياشة، دلدقة مشاعر وطنية، القصة كلها هتبقى في المزيكا الفرحانة المبتهجة بإعادة اسم مصر للوجود.

غنوة بليغ حمدي، اللي كتبها محمد حمزة، بقت طرف أساسي في أي حاجة جماعية: ثورة، ماتش كورة، احتفالات، كرنفالات، حتى في الكباريهات الشيك، يا حبيبي يا مصر فقرة أساسية في البروجرام.

في نفس السنة، بليغ قدم غنوة تاني لحسين السيد، اسمها: "سلموا لي على مصر"، غنتها صباح في فيلم نار الشوق، سنة 1970. علشان كده، لما بليغ خد الحكم في قضية سميرة مليان، راح لخمود عوض، وكان كل تعليقه إنه مكش مستني كده من "مصر".

جاهين مكش أغنية، لكن كتب قصيدة، كتبها في الوقت اللي الدولة قررت ترجع اسم مصر لمصر، وسماها على اسم مصر.

كثير حاولوا يغنوا قصيدة جاهين، بس هي فعلا كانت أكبر من أي قالب غنائي اتخطت فيه، وده اللي بيخليني أصدق إن بليغ قال كده لجاهين.

قصيدة "على اسم مصر" انضرت كثير من أعمال كثير اتكتبت زورا وبهتانا على إنها مكتوبة لمصر، وهي في الغالب تسديد خانات مش أكثر. بس كم الغنا اللي اتكتب لمصر مش طبعي، مصر هي أمي، ويبقى إنت أكيد ف مصر، ومصر يا مصر، وبجبك يا بلادي، وصوت بلادي، والله الله ع "المستقبل" يا بلدنا يا مصر، بلدنا يا مصر، بلدنا يا مصر للللله.

لو ينفع، ولو مش هيبقى ممل، كنت مشيت بيت بيت، كلمة كلمة، حرف حرف مع القصيدة، وأدخل في عوالمها، بس متهيألي إن كثير مننا محتاج يعمل كده.

أصلا، بداية القصيدة يان النخل في العالي، والنيل ماشي طوالي، (معكوسة فيه الصور، مقلوبة، وأنا مالي؟) دي محتاجة ناخذ فقرات من شخصية مصر بتاع جمال حمدان لشرحها، دي مكونات مصر: حاجات مستقرة مخاصمة بعض، وأوضاع مقلوبة، ومحدث مهمت، يا حبيبي يا مصر.

الغريب إن كثير من الناس بيتجاهلوا البداية دي، ويبدأوا القصيدة مباشرة بأشهر مقطع: على اسم مصر التاريخ يقدر يقول ما

شاء، مع إن المقطع ده مرتبط جدًا باللي قبله، اللي هو أساسا تعليق  
على قرار إعادة مصر لاسمها:

قطعوا الأغاني وطارت نشرة الأخبار  
دارت على كل دار في الكوكب الدوار  
يا حاضرين اعلّموا الغايين بأنه في مصر  
اتغير الاسم منذ الآن فأصبح .. مصر  
ضحك التاريخ ضحكته المشهور بها واندار  
ودخل مناقشة مع الجغرافيا عما صار  
هل نعرف بالبيان اللي أذيع العصر  
أم ننتظر مصر تطرد اسرائيل بالقسر  
وساعتها تحصل بكل جدارة يوم النصر  
على اسم مصر

مش هاكلملك هنا عن اهتمام جاهين بالعلاقة بين الشكل  
والمضمون، وإنه أصلًا يقول إن الموضوع مش في "اسم مصر"، ولكن  
في فعلها، وسيادتها على أرضها وقرارها، وإنه حكاية إننا مصريين دي  
حاجة مش كفاية أبدًا لدخول التاريخ أو حتى الجغرافيا.

لكن هاكلمك عن إن "على اسم مصر" ما هياش قفلة مجانية  
احتفالية تمجيدية، لأ، ده اشتباك مع البلد صعبة المراس دي، اللي ما  
تعرفلهاش، اللي تحبها وتلعن أبوها بعشق زي الداء.  
خلونا بس نشوف المقطع ده:

على اسم مصر

أحسننت في القول صحيح يا ولد يا متبي  
جبت اللي جوه الفؤاد عن مصر متعبى  
وحكمت بالعدل لكن بعضنا انظلموا  
" يا أمة ضحككت من جهلها الأمم "  
العلم كان عندنا من صغره متربي  
لكنه هاجر وعدى البحر متخبي  
لما الإيران هجموا ثم اليونان هجموا  
ثم الرومان دمروا ثم التار هدموا  
ثم الجميع (كل واحد جه مسح قدمه  
على اسم مصر)

أو شوف المقطع ده:

والمس حجارة الطواي وادق بكعابي  
يرجع لي صوت الصدى يفكرني بعذابي  
يا ميت ندامة على أمة بلا جماهير  
ثورتها يعملها جيشها ومالها غيره نصير  
والشعب يرقص كأنه عجوز متصاي

اقرا المقطع الأخير، وراجع الصور اللي بنشوفها من 30 سنة لحد  
دلوقتي،

يا أخي، جاهين ده يجبرك تقول الكلام اللي إنت مش بتحب  
تستخدمه، زي عظيم، رائع، مدهش، تشريح دقيق للمجتمع،  
إحساس عالي، إلخ إلخ، مش هيخلينا نتفاعل مع قصيدة بتعتمد على  
عبارة بقت من أكثر العبارات المبتذلة: على اسم مصر.

أكيد هنرجع نتكلم عن جاهين وبلغ وعلاقتهم بمصر، بس مبدئيًا  
كده، تحية للشركة المجهولة اللي على اسمها اتسمت العمارة اللي في  
شبرا، واللي جابت لنا اتنين زي دول في طلعة واحدة.

## سبع حسانات في ميزان

### فتحي قورة

1. فتحي قورة أندر رايتيد جامد، بالنسبة لي حكاية الأوفر ريتيد والأندر ريتيد بتفرق كثير في التقييم، مع إني مش باحبذ التقييم، وبافضل التحليل، بس لما نتكلم عن "حب" و"كره" مفيش مهرب.

وقورة من كتاب الأغاني اللي مش بيعملوها هيصة وزمبليطة زي حسين السيد ومرسي جميل عزيز ومأمون الشناوي وحتى عبد الوهاب محمد. مع إنه، بكتير من الموضوعية، ما يقلش عن حد فيهم، ولو تخليت عن موضوعي هاقول إنه الأفضل على الإطلاق.

من واحنا صغيرين، واللي بيتكرس جوانا، حتى لو مش مركزين، إن فيه "طبقات" لشعراء الأغنية، وتحس إن الإعلام الرسمي دايماً



حاطط قورة في الطبقة الأقل مع ناس زي عبد العزيز سلام ومحمد علي أحمد ومحمد حلاوة، ناس بالكثير يقولوا اسمها في الراديو بعد الغنوة: واستمعنا إلى فلان من كلمات فلان وألحان علان. لكن صعب تلاقي له لقاء في التلفزيون، حوار في الراديو، احتفال بذكراه، الحاجات دي يعني. مع إني لو مستول عن إذاعة الأغاني أعمل يوم في الشهر لأغانيه.

2. لو فيه حاجة مشتركة بين كافة أشكال الأغنية من أول الشيخ سلامة حجازي لحد أوكا وأوريجيا، هتكون الحاجة دي هي "القافية". نادر جدًا لما تلاقي غنوة من غير قافية سواء كانت دور قديم، طقطوقة، موشح، مهرجان شعبي، غنوة ستايل غربي لفرقة زي المصريين أو الجيتس أو جازاجة (عمدان النور)، كل الغنا المصري تقريباً بيلتزم بالقافية، وبغض النظر دي حاجة كويسة ولا وحشة؟ المفروض تستمر أو المفروض نكسرهما، دي مناقشة تانية، لكن على أرضية اللي حاصل، فالشاعر الغنائي اللي باعتبره سيد القوافي وتاج راسها هو فتحي قورة، بص يا سيدي:

أ. ممكن عادي يمسك أي قافية صعبة، ويشغل عليها بمنتهى السلاسة، لحد ما يخلص الكلام اللي ع القافية دي في اللغة، مثلاً، في غنوة دقي يا مزيكا حسب الله:

علشانك أروح المريخ  
وأحذف لك من فوق صواريخ  
والأرض اللي بتمشي عليها  
أضربها تطلع بطيخ  
وعذولك أشويه ع السيخ  
وأعمل لك م المانجة فسيخ

أو في غنوة "إذا جنت":

يا سارق لي النوم يا سبب حيرتي  
يا اللي ما فيه يوم بتجيب سيري  
بأمانة إني ما عمري شرقت  
ولا حق بقربك مرة فوجنت  
وف وسط الناس خلّيتني عرقت  
هو إنت لوحدك يعني خُلّقت

فالقوافي هنا ماشية بسلاسة غير طبيعية، رغم إنها صعبة جدًا،  
ومفيش سطر ركيك جي بس علشان يظبط الوزن.

كل شعراءنا "الكبار" عندهم الحجة دي، إنك تلاقي كلمة تعبانة  
مش ماشية في السياق علشان بس تظبط الوزن، مثلاً، مرسى جميل  
عزيز في غنوة "يا حلو صبح":

مكتوب عليّ أبصر لفوق

وأجيب لقلبي شوق على شوق

لحد هنا شغال، وخادم المزيكا وزى الفل، لكن هو عايز الكوبليه  
بشطر تالت على نفس القافية، فيقول لك:

والحلو دائماً حلو وذوق

بالنسبة لي القفلة دي بائسة جدًا، واستسهال آخر حاجة، بس  
معلش، مين هياخد باله من السمعية بعد محمد قنديل ما سحلهم رايح  
جي، وفوق وتحت؟

حتت كتير عند مرسى وحسين السيد والأبنودي وغيرهم وغيرهم  
أقدر أشاور لك عليها، وأقول لك: الشاعر اتزنق هنا، ما يجراش

حاجة كلنا بنتزق، لكن ده نادر جدا عند فتحي قورة، والقطنة ما بتكدبش.

ب: مش بس الاسترسال في القوافي الصعبة، وكتابة سطور كثير على قافية واحدة صعبة، لكن فيه قوافي مدهشة، وسر الدهشة إن القافية بتكون سهلة جدًا جدًا، بس تلاقي راح كاتبها في منطقة غير القريب ده خالص.  
مثلاً:

وآخرة الانتظار

نسيقي وعدنا

أهي "وعدنا" دي أسهل حاجة في الدنيا، هتجيب بعدها: حبنا وقلبنا وعمرنا وعهدنا وأي حاجة تخص "نا"، لكن تعال شوف هو عملها إزاي:

وآخرة الانتظار

نسيقي وعدنا

ما أعرفش ده احتقار

أم قلة اعتنا؟

بالنسبة لي اللي عمله ده منتهى الإتقان، كلمة دقيقة جداً "قلة  
الاعتناء" فعلا هو المظبوط تماما، وحطها كأنه بيتتنفس

كذلك:

ضيعنا 100 مقابلة

في مين يقولها قبلًا

ولا هنروح بعيد ليه، راجع مثلا، حلو الحلو بتاعة شكوكو،  
وانت تسمع الدرر.

ج. فيه نوع من القوافي، مش بيعتمد على إنك تكرر نفس نهاية  
الكلمات، لأ، بتكرر الكلمة كلها، وده جي من الموايل الفلاحي  
السباعية، أهو فتحي عمل من النوع ده يبجي بتاع ميت غنوة،  
هيتكتبوله في ميزان حسناته، زي مثلاً:

وحياة عينيا دول

قاسين علي دول

قولوا أعمل إيه

في حبايب قلبي دول

وزيها: "الحلوة ليه زعلان قوي"، و"حلوة بشكل"، وغيرهم كثير،  
مفيش أي إحساس بالملل، أو بالركاكة، رغم إن الكلمة بتتكرر ثلاث  
3 مرات في أربع سطور، رهيب والله رهيب.

3. فيه حاجة عملها كثير شعراء الجيل ده، وبطرق مختلفة، وهي  
خلط الفصحى بالعامية، وفي أجيال بعد كده سمعنا أنغام بتعمل ده  
كثير، في النص الأول من مشوارها، أيام ما كانت بتشتغل مع أبوها.  
زي "لازلت أبحث عن سبب" أو "يعلم الله والبشر لا يعلمون" وغالبا  
كان اللي بيكتب كده عزت الجندي.

لكن لا في الأجيال القديمة ولا الجديدة، هتلاقي حد بيعمل ده زي  
فتحي قورة، مثلا:

هل تذكرين هل

أيتها الماكرة

شوفي لك يا اختي حل

ف ضعف الذاكرة

وتلاقيه في غنوة تانية كاتب:

ما يقولش بالصراحة

بيبيع وبيشتري

واتعلمت السباحة  
في الدمع اللي جري  
(وياما الحلم لاحا  
للعينِ الساهرة)

أهو ده فعلا اللي يقفز كالفراشة ويلدغ كالنحل.

4. السخرية في الفن بشكل عام، سلاح ذو حدين، علشان كده  
الشعرا يفضّلوا إن السخرية تبقى في أعمال منفصلة كوميدية،  
مكتوب على وش العمل كده: هيا بنا نضحك.

قورة في المنطقة دي كان مقطع البطاقة، كانت السخرية ملمح  
مهم من ملامحه، ولذلك ما ينفعش دويتو زي: يا سلام على حبي  
وحبك، (شادية وفريد الأطرش) يكتبه حد غير اليرنس بتاعنا، دويتو  
كامل مكتوب بحيث ينفع يبقى أغنية عادية بين اتنين حبيبة، وينفع  
بالتصوير يبقى حاجة تانية خالص.

صحيح فيه ناس عملت حاجات عظيمة بس بالقدرة دي، صعب.

5. كل الحاجات اللي عمالين نقولها هنا باعتبارها مزايا، عطلت  
فتحي قورة عن إنه يكتب مثلا لأم كلثوم، أو حلیم (كتب له كام  
أغنية ع الماشي)، لأن الناس كانت بتعامل معاه باعتباره "نمرة"،





## حزن يا بقال ..

### ذهاب بلا عودة

113 ألف مشاهدة لغنوة مش متصورة، أوديو بس، رقم ضخم، وهي غنوة تستاهل، بتكلم هنا عن سيرة الأراجوز اللي كتبها خالد عبد القادر ولحنها يحيى نديم وغنتها فرقة عمدان النور (جزجة).

صحيح المزيكا جميلة، ولعبة دور كبير في ترجمة الكلام، بس الكلام نفسه مدهش، وفي تقديري إنها تنفع نموذج واضح تعليمي لفكرة إنه ممكن الكلام مش مفهوم قوي، أو مش مفهوم خالص، بس محبوب. يعني اللي بيسمع حاسس إنه فيه حاجة، حتى لو مش لاقط الحاجة دي، بس أكيد فيه حاجة.

الميزة الكبيرة لهذا النوع من الكلام هو إنه ينفع يتقري عشر قرايات مختلفة، وكل حد يبقاله تأويله أو تفسيره الشخصي للكلام،

والكلام يفضل عنده القدرة على توليد المعاني دي كل شوية، بس  
طبعا ده سلاح ذو حدين، لأن اللي بيسمع وارد جدًا يشوف إن ده  
كلام مالوش معنى فيقفل من الغنوة للأبد.

طب "سيرة الأراجوز" نفسها عاملة ازاي؟

بالنسبة لي، الغنوة دي من أجمل الحاجات اللي اتكتبت عن  
الانتقال من الريف للمدينة، حضرتك طبعا عارف إن كثير من  
"المبدعين" جاين من أقاليم، الصعيد، الفلاحين، وحقى إسكندرية  
والله، فيه ناس بتعتبرها أقاليم ولكن بدرجة أقل.

المهم إن المبدع ده بيجي من بلدهم، وياخد الصدمة، سواء نجح  
سواء فشل، مش بيعس إن هو ده اللي جه عشانه، صحيح كلنا  
واحنا أطفال بيبقى عندنا تصورات للحياة، ويناخذ الصدمة لما بنكبر،  
بس بقى لما ينضاف للتطور في الزمن ده، تطور تاني في المكان بتبقى  
الصدمة خاصة ومضاعفة.

الكلام عن الصدمة دي مش جديد، من زمان قوي والشعرا  
مشغولين بيها، مش عارف من إمتى بالظبط بس على الأقل من أيام  
أحمد عجمعطي حجازي وبعده أمل دنقل، بس ميزة الغنوة اللي احنا  
بتتكلم عنها إن الموضوع مش مباشر، إنت بتلقطه من خلال  
الكوابليات.

بتبدأ الغنوة بأول ما جده، وجاب له صاحب، راحوا مع بعض، جم  
مع بعض، اتشاقوا مع بعض (زقني في المترو زقيته) بس طبعاً العلاقة  
دي ما استمرتش (مات فيّ ومت أنا فيه) وبالمناسبة دي لقطة عبقرية  
جدا استخدام "مات فيّ" بالمعنيين، وكأفها رحلة في المكان من أول ما  
"مات في" بمعنى الحب الشديد، لحد ما "مات في" بمعنى خسرتة.

بعد كده تبدأ الجملة الرئيسية، اللي بيسموها "السنو"، اللي هي  
بتكرر كل شوية، وهي المعبر الأساسي عن التحول من الطفل الريفى  
للرجل اللي عايش في المدينة:

فيه حزن يا بقال ورا الجامع  
ولذلك:

هات بنص ريال عسل في الكوز  
أصل إيه:

اللي كان عيل (في بلدهم) بقى شاعر (في غربته)  
واللي كان ضاحك (في بلدهم) بقى أراجوز (في غربته)  
بعدين يبدأ عبد القادر يوصف تفاصيل الرحلة، والتحويلات اللي  
حصلت له خلالها:

حبني الشارع وحبته

ولكن:

عض قلبي الليل وعصيته

مش بس الليل ده البني آدمين كمان:

خضني الإنسان وخضيته

لما بان من وشه عفاريته

على مستواه هو بقي:

عدى فيّ القمح سمري

وبعدين:

عدى فيّ الفجر صبري

ولذلك:

عدى فيا الحزن غيري

وإجمالاً:

عدى في العمر كبرني

العمر ده عمل إيه:

خدني م اللقة لمريلي

خدني م التسنين لحصالي

خدني من مدرستي ع الجامعة

خدني م الترعة على الأسفلت

الجملة الأخيرة هي مفتاح كل حاجة: من الترعة على الأسفلت،  
هو ده الموضوع اللي بتكلم عنه الغنوة، ولو احتفظنا بالجملة دي  
هنلاقيه بيقول في الآخر:

قطع الأسفلت شرايفي

بس دلوقتي خيلنا نتابع الغنوة، وناخد نموذج للي حصل له في  
المدينة الكبيرة، من خلال الأنوبيس (أكثر مكان بيعبر عن أخلاق  
الزحام، والزحام مش تعبير عن الحياة قد ما هو تعبير عن الموت):

خدت م الأتوبيس مراياته

خدت م السواق حكاياته

خدت م الركاب تذاكر موت

ولذلك نرجع تاني للحنين، حزن يا بقال .....

الصدمة الحضارية الثانية اللي بيتعرض لها "الغرباء" هي الحب، هو عنده حلم رومانتيكي، وهو مش قد الحلم، بيحب واحدة، بتتجوز غيره، بيتصدم (صدمة قديمة، دلوقتي محدش بيتصدم الصدمة دي تقريبا):

ياللي وحشاني متوحشنيش

ضحكك السكر محلايش

شفتك المطرة قفلت الشيش

ليه فضل اسمك على الشباك

كنت جايب دبلة وغويشة

كنت شارب خمرة مغشوشة

(غبروها لـ "حاجة مغشوشة" على أساس إن الخمرة عيب  
وحرام)

شفت (شبهك) قاعدة في الكوشة

قلت هي لا مش هي

فتشتني الدمة عن مية

كنت أنشف من حطب محروق

يعني: شفتك في الكوشة، بس مكنتيش إنني اللي أنا حبيتها، دي  
واحدة شبهك، قلت هي ولا مش هي، بس لما اتأكدت إنك انتي،  
دموعي كانت عايزة تزل، بس مكنش عندي دموع، كنت جاف  
زي حطب محروق.

طبيعي بعد كل الصدمات والتحولات والغربة دي أبقي حزين  
جدًا، ويبقى الحزن هو المفسر والضمير والصاحب وكل حاجة:

حزني يا محول خطوط سيري

حزني يا عطار في باب اللوق

شوف لي (يا حزني) تحويجة لتفسير

حط ريحة بن لضميري

شوف لي عود أصلب من المغشوش

وتنتهي الغنوة بعدودة، والعدودة هي غنا في الجنائز، عدودة فيها  
قدر من البكائية والصفاء والمزاج من الحاجات التي بتعجب الجمهور،  
وهو هنا يخاطب الناس كلها من خلال صاحب افتراضي، يوجه له  
لوم على فشل الجميع في حياة سليمة، فشل الجميع في إننا نبقي مع  
بعض، أو على الأقل نتجنب أذى بعض:

مر انا يا صاحبي لو دوقتني

جيت اقول الاله ما صدقتني

يطرح ايه الملع غير مالح

يطلع ايه م الجرح غير مجروح

ليه ما تصفاشي لغير صافي

ليه في عز الحوجة بتجافي

شوفتني غاطس وأنا طافي

كنت بندهلك حلاوة روح



وتكون النتيجة النهائية هي الرغبة في الرجوع، زمنيا للطفولة،  
ومكانيا للأصل، الريف، اللي عبر عنه هنا بـ: بياض القطن وشاش  
اللوز:

خد سنين الجرى وسنيني  
هاتلي سن غزال ذهب عيني  
قطع الأسفلت شراييني  
هات بياض القطن شاش اللوز.

يعني، دي فكرتي بالنسبة للغنوة الجميلة، واللي لسه محتاجة كلام  
كثير ممكن نقوله في سياقات تانية، بس مبدئيا، لازم نشاور على  
حاجتين عملتهم المزيكا في الكلام، وكانوا في صالحه جدًا:  
الأولى:

إنه مخدش القصيدة زي ما هي، القصيدة كانت أكثر مباشرة سنة  
صغيرة، وكانت طويلة، وكان فيها تفاصيل كثير يمكن الاستغناء  
عنها، يعني باختصار، اللحن "شد" الكلام، وأزال منه الترهلات.

التانية:

التكرار المدهش للسنيو: حزن يا بقال ورا الجامع، لأن السنيو في معظم إن لم يكن كل أغانيها يبقاله مكان معين في الغنوة، كلنا ببقى عارفينه، يعني مثلاً في كل مرة أم كلثوم بتقول:

بدي أشكيلك من نار حبي

إحنا ببقى عارفين من قبلها بدقيقتين إنما رايحة للجمله دي.

أو لما عبد الحليم يقول:

لما رمانا الهوا ونعسنا

اللي شبكنا يخلصنا

أو لما عمرو دياب يقول:

وازاي يا حبيبي يا عمري يا أغلى الناس ف عنيّ

معقول أنا هنت عليك وازاي هنت إنت عليّ

وهكذا دواليب، السنيو ده حاجة مكانها مقدس، كلنا عارفين  
هيبدأ إمتى.

لكن في سيرة الأراجوز، كل مرة بيردد فيها:

حزن يا بقال .....

بتبقى مفاجئة ومدهشة، ومع ذلك بتحس إن ده مكانها الطبيعي،  
فتلاقي نفسك، حتى لو مش لاقط معنى الكلام قوي، بتردد: الله.

## فين الضمير يا جدعان؟

من ساعة ما بدأت علاقتي بالأغاني، من يبجي 35 سنة، وفيه حاجات كده بتعمل لي الخبطة، ويتسبب لي التوتر لما باقابلها، ومن أهم الحاجات دي، لما بالاقى نفسي بأسأل: هو فين الضمير؟

الضمير هنا مش بالمعنى الأخلاقي، لكن بالمعنى اللغوي العادي، الضمائر: أنا .. إنت .. هو .. هي .. إحنا .. هم، كده يعني، لأن استخدام الضماير في أغانينا فعلا محتاج دراسة، كان نفسي طول الوقت أعملها، بس خلينا نبدأ مع بعض، ونحاول نفهم.

أول حاجة غريبة بالنسبة لي هي إن المتكلم يبقى راجل (مذكر)، والخطاب موجه لراجل (مذكر برضه). عارف إنها حاجة عادية وطبيعية في الغنا، لدرجة إننا ما ناخدش بالناس منها، بس هل إحنا

بنعمل كده في الحياة: إنك تكلم حبيبتك/ مراتك بصيغة المذكر؟  
بيحصل أحيانا على سبيل الدلع، بس ده مش العادي، وأظن إنه بتأثير  
من الأغاني مش العكس.

طيب، منين جت؟

أعتقد، والله أعلى وأعلم، إن الحكاية دي من تأثير أبو نواس على  
الشعر العربي، يعني ما قابلتش حد قبله كتب أي قصيدة بتستخدم  
ضمير المذكر في الحب والغزل، وإذا حد لقي يا ريت يصلح لي  
وأكون شاكر.

أبو نواس، زي ما احنا عارفين، من علامات المثلية الجنسية في  
التراث العربي، وأعتقد إنه كان باي سكشوال، ومن أوائل القصائد  
اللي كتبها، ويمكن الأولى، اللي بيتغزل فيها بشاب:

قد رضينا بسلام

أو كلام من قريب

.....

قف إذا جئت إلينا

ثم سلم يا حبيبي

(بين البيتين فيه بيت محذوف مش موضوعنا دلوقتي)

اشتهار أبو نواس بالمثلية، وزيه عمر الخيام، هو اللي خلى ناس  
كثير تعلق على غنوة هذه ليلتي بأنها غنوة فيها غزل مثلي:

والنواصي عائق الخياما

المهم، إنه من أبو نواس انتشرت العادة دي، وبقي الشعر بيتقال  
بصيغة المذكر للحبيب، وفي عصرنا الحديث اعتقد، والله أعلى وأعلم،  
إن كل مطربينا الرجالة غنوا أغاني للحبيبة بصيغة المذكر، من أول  
عبد الحامولي لحد سامو زين.

عموما، إذا جت على دي قهون يا معلمين، خد عندك، لما يبقى  
المطرب راجل (مذكر) والغنوة تبقى على لسان واحدة، أو العكس،  
ونبدأ بالعكس: لما تكون مطربة وبتغني الغنوة على لسان واحد.

طبعا أم كلثوم ليها السبق في الموضوع ده، وغنت أغاني كثير،  
اللي بيتكلم فيها راجل، مثلا:

الحب كله:

يا حبيبي يا ملاك أحلامي

يا روح قلبي

أنا كنت إيه؟

قبل ما اشوفك

أنا كنت إيه؟

و كنت (عائش) يا حبيبي

أيامي ليه؟

طريق حياتي مشيته قبلك

في ليل طويل

لا قلب جنبي يحس بيا

ولا طيف جميل

ولما شفتك

أول ما شفتك

بكل شوق الدنيا لقيتني

(مشدود) إليك

أو ليه "الحب كله": هي أصلا ليها أغنية اسمها: ليه تلاوعيني وانتي

نور عيني

لما تدور في أغانيها، هتلاقي تقريبا أم كلثوم لوحدها اللي بتعمل كده، وبسهولة، ومن غير ما حد ياخذ باله، يمكن نجاة ليها غنوتين ثلاثة في البدايات لما كانت عايشة فيث دور أم كلثوم، قبل ما عبد الوهاب والطويل يدوها شكلها اللي بلوره بعدين بليغ حمدي، في المراحل دي مش هتلاقيها أغنية بالطريقة دي باستثناء "لا تكذبي" بس دي طبعا حالة خاصة جدًا، وليها سياق درامي في فيلم الشموع السوداء، وسياق درامي ف الحياة، وكده يعني.

إنما غير أم كلثوم ونجاة ما أعتقدش إن حد غنى بصيغة مختلفة، واللي يعرف حاجة يصحح لي، حتى وردة لما غنت "على رمش عيونها" غيرت كلامها خالص، علشان ما تغنيش بخطاب من المذكر للمؤنث، وعبد الحليم كمان لما غنى "رسالة من تحت الماء" ونزار قباني أصلا كاتبها على لسان واحدة ست، غير الكلمات من:

فأنا (عاشقة) من رأسي حتى قلبي

خلاها:

فأنا (مفتون) من رأسي حتى قلبي



ونلاحظ إن منير لما أعاد غناء "يا حبيبي عود لي تاني" بتاعة شادية،  
احتفظ بالضمائر المؤنثة:

قالوا (حبي)

رد قلبي

قال بحب الأولاني

لكن بعد سنين، لما أعاد غناء "أنا باعشق البحر" بتاعة نجاة، غير  
الضمائر وخلها من المذكر للمؤنث:

أنا باعشق البحر

زيك (يا حبيبي) حنون؟

فالإخلاصة هنا: إنه مش من المستساغ إن المطرب أو المطربة يغني  
عكس نوعه أو جنسه وإن الاستثناء هنا كان أم كلثوم.

وإذا طلعتنا من قصة المذكر والمؤنث، ودخلنا في المفرد والجمع،  
هنلاقى إننا كتير بنلاقى الأغنية بتتكلم عن الحبيبة أو حتى المطرب/ة)  
يتكلم عن نفسه بصيغة الجمع.

مش هاتكلم هنا عن أصل القصة دي، أعتقد إننا عارفين، دي عادة عربية من قديم الأزل، ليها علاقة بالفخر والتعظيم أحياناً، أو بالخجل في أحيان تانية، لكن الملاحظ بالنسبة لي إن استخدام صيغة الجمع قبل التمانينات كان مقتصر على الغنا "الشعبي"، يعني لما كان صناع الأغنية يحبو يدوها طعم شعبي كانوا يعملوا كده، فتلاقي الظاهرة دي عند حورية حسن، عبد العزيز محمود، لكن صعب تلاقيها عند عبد الوهاب أو أم كلثوم أو حلیم، حتى لما لقيت غنوة لعبد الوهاب بتقول:

يا اللي انت ناسينا

افتكرت إنه بيتكلم عن: أنا والعذاب وهواك، الثلاثة.

في السبعينات، كان المؤلفين الجدد عبد الرحيم منصور وسيد حجاب وغيرهم بيستخدموا صيغة الجمع، علشان يخرجوا بالغنوة من الخندق الصغير بتاع رمشه ورمشها وعيونه وبقها، الجو بتاع: "على قد ما حبيناً" مثلاً.

مع عمرو دياب، وبداية من شوقنا أكثر شوقنا، هتلاقي الفرق ده زال، وكالعادة بعد عمرو دياب ناس كثير قلدته، وما بقاش ده له معنى، بقى أي ضمير ينفع في أي حته.

الظواهر دي ما أعتقدش إنها كانت محل دراسة وتأمل وتفكير، وما اعرفش إذا كانت تستاهل المتابعة ولا الواحد بيبالغ، بس الواضح

في تقديري، إن إهمال التفكير في التفاصيل دي كان هو السبب في إن الأغنية بداية من التسعينات بقت بتشوف حاجات ليها العجب، فيما يتعلق بتصريف الضماير، بقت أي حاجة تنفع في أي حنة، ومحمدش بيركز، لدرجة إننا سمعنا غنوة بتقول:

عيني (ما قدروشو)

على سحر رموشه

وعادي يعني محمدش دقق، ولا قال إيه يا عم الكلام ده؟

وكان فيه غنوة زمان لأمين سامي، كل ما كنت أسمعها، كنت باموت من الضحك، الغنوة كانت بتقول:

الناس في دواماتها

حياقم زي موتها

وناس بتحسب روحها عايشة وهم ماتوا

وما تبقاش عارف مين بيودي فين؟ كل اللي كان يبطلع علي كل ما اسمع حاجات زي دي:

فين الضمير يا جدعان؟

فين الضمير؟

## تسلم الأيادي ..

### بس ما تسلمش قوي

يا أخي الواحد مقتنع إن مفيش حاجة بـ "تنتشر" من غير سبب، مش عايز أستخدم تعبير "تنجح"، خرينا نقول تنتشر، كده متهيألي أدق. لكن مفيش حاجة كده "اللاوي" زي ما بيقلوا. وبالتالي، يحاول أفكر دائماً، ليه الغنوة الفلانية اشتغلت، والغنوة العلانية عطلت، ولو انتشرت، انتشرت في أي أوساط، ولحد إمتى، وهكذا أشياء.

وياما بنسمع تفسيرات تبان منطقية إنما هي في الآخر عاطفية أو أخلاقية، مالهش دعوة بالموضوع، من نوعية أصلها لمست الناس، أو أصل الناس تافهين فيسمعوا التافه، التفسيرات اللي زي دي، الأحسن منها إن الواحد يقول "مش عارف"، عادي يعني بتحصل

ساعات إن الواحد يبقى مش عارف، فالبني آدم مش لازم يكون عنده إجابة لكل سؤال في الكون.

لكل هاتيك الأسباب، لما غنوة زي "تسلم الأيادي" تنتشر بالشكل ده، ما يتفعش أتعامل معاها باعتبارها "غنوة مناسبة" نجحت لأسباب تخص توقيت عرضها والسلام عليكم ورحمة الله، لأن فيه 3 طن أغاني اتبدروا في الجو وقتها، مفيش حاجة لفقت غيرها، يبقى الموضوع، منطقيًا، له أسباب تانية غير التعريض، وده اللي حاولت كثير أفهمه.

كاتب الغنوة هو الأستاذ مصطفى كامل نقيب الموسيقيين، والله ما أعرف إن كان الحالي أو السابق، وانتشار مصطفى، وأغانيه، قديم، مش ابن إمبراح، مصطفى تقريبًا من يوم ما ظهر ونادرا ما بتخيب له غنوة. ودي فعلاً حجة تستحق التأمل والدراسة والفهم حتى لو كان الـ "شعور" ضد درش واللي بيقدمه من أداء واللي بيمثله من قيم.

مصطفى بدأ طريقه مع الغنوة سنة 93 بغنوة مع الفنانة أميرة، الله يرحمها (الرحمة تجوز ع الحمي برضه)، ومع الوقت بدأت رجله تنقل في السوق ويتصدر المشهد، للدرجة إنه في سنة 2005 قرئت قائمة بأعماله، لقيت إن عدد المطربين اللي غنوله وصلوا 56 مطرب .. 56 مطرب يا مواطن، اقرا معايا سورة الفلق، يا ريتهم كانوا 55 بس عشان العين.

طب كل الناس دي بتختار أغانيه ليه؟

الواقع إن ما يمكن رصده هو التالي:

1. اهتمام مصطفى الكبير بما يمكن أن نسميه "هندسة الغنوة" يعني طريقة رص الكلام فيها، تعالى نراجع أغاني زي: "الأيام الحلوة"، و"أكثر من كده إيه" لإيهاب توفيق، أو "احلف" بتاعة بهاء سلطان، أو "ارجعوا" لحمادة هلال، "طول الوقت" اللي غناها مصطفى نفسه، وأغاني كتير زيهم، مصطفى في الأغاني دي بيعمل إيه؟ بيعمل قالب، القالب ده الشهادة لله مبتكر، ويساعد الملحن جدا، ويكون القالب ده معتمد على تكرار معين للأشطر بمقاييس رياضية منضبطة جدا، ودي مسألة صعبة على فكرة، صحيح في كتير من الأحيان بيملئ البنا ده تراب، بس بيخلي الجمل الموسيقية تلزق في الدماغ، وبيحسك إن الموضوع كبير، وهو أحسن واحد يعمل الحكاية دي.

ولو خدنا الأيام الحلوة مثال، هو عامل قالب مكون من عدد

التفعيلات التالي:

6 - 3 - 3

(2+1+1) 4 - 2 - 2

حبل الود اتسيب (3 تفعيلات)

طعم الظلم يشيب (3 تفعيلات)

زمن الصدق وزمن الطيبة بقت حاجة بتتعيب (6 تفعيلات)

معنى الحب — نزيفه	(تفعلتين من بحر تائي)
صوت الحق — نكتفه	(تفعلتين من البحر الجديده)
واللي دايجنا	(تفعيلة واحدة)
ساكن روحنا	(تفعيلة واحدة)
واللي جارحنا بننصفه	(تفعلتين)

راجع حضرتك الغنوة كلها، هتلاقيها ماشية بنفس السيستم المعقد ده، ما هيّفتش منه ولا مرة، رغم إنه كرر الموضوع ده أربع مرات.

طب وهي دي حاجة كويسة يعني؟ ما هو رص كلام أي طفل في ابتدائي يعرف يعمل.

خلينا نبدأ الإجابة من النص الثاني، مش أي حد يعرف يرص الرصة دي بالإتقان ده، لكن هل دي حاجة كويسة ولا لأ؟ فالواحد بيشفوف إنه في حد ذاته لأ، هو "أوبشن" والاكتفاء بيه طبعا بيطلع

ناتج ضعيف فنيا، بس من الناحية التجارية واضح إنه كفاية وتمام وزى الفل. وهي دي الكارثة.

2. جوة السيستم، اختيار القوافي بيكون له دور كبير، لأن السيستم أصلا قايم على تكرار القافية كل كذا تفعيلة، ومصطفى كامل عادة بيختار قوافي حادة ومتلمعة ومهجورة، فاء، خاء، همزة، عين، لام، أي حاجة.

القافية الحادة دي بتساعد أكثر على حفظ الغنوة، وإفما تلزق في الودن، وده من أهم أسباب الانتشار، ومصطفة بيصرّ على كده حتى لو عمل مصايب، وجاب كلمات مش في مكانها، أو بوظ تركيبات جمل، مش مهم، محدش بيركز في التفاصيل، المهم إن أي حد يسمع الغنوة يقعد يدندفها ولو على سبيل السخرية.

ارجعوا

عيني عليكم كل يوم بيدمعو

محدش هياخد باله إن "عيني" اللي واحدة، مش بنصرف معاها الفعل في الجمع، وإفما المفروض عيني "بتلمع" مش "بيدمعوا"، كل دي تفاصيل، أصلا ممكن تلاقي ناس بتقول لك: لأ، التركيبة كده صح. فـ انت تبقى مضطر تقول لهم إيه: ربنا يوفق الجميع.



3. إلى جانب الشكل، مصطفى كامل قدر يلقط مساحة محدث قبله اشتغل فيها، وهي مساحة "الغل". الغنا المصري طول الوقت فيه نبتة للمنطقة دي، خصوصا الغنا الشعبي، تلاقي فيه شكوى من الزمن والناس، ومرارة وصعابيات. والمنطقة دي بيبقى فيها غل، بس خفي، غل بيستخى ورا مسكنة، أنا مسكين، والناس بتفحتني.

مصطفى بقى عمل إيه، طلع الغل المخفي ده، وهتلاقي كثير من أغانيه، خصوصا أغانيه لنفسه لما خد فرصته بالكامل، بقى يطلع المكبوت كله، وبقى عادي جدا إنه يعامل حبيبه في معظم الأغاني باعتباره المخدة دي اللي بيتدربوا بيها في الملاكمة، ويقعد ينفض فيه، ويهزأ، ويمضيه على كمبيالات.

مرة دعيت صديقي الطبية النفسية بسمة عبد الرحمن إنها تعمل تحليل لغنوة من أغانيه، وهي "احلف"، طلعت منها زُبد. ربنا يعفي عنا.

4. إذا أضفنا لكل ده إن درش لا يتورع عن الاستعانة بأي حاجة علشان يظبط تركيبته دي، جملة سمعها من شاب (أو اشتراها منه)، جملة من أغنية قديمة، تراث، حاجة فاكرها تراث وهي بتاعة حد تاني، أي سداية تسد أي خرم (النجارين هيفهموني كويس)، أي حاجة بس المعادلة الرياضية وتركيبية القافية والنفساوية تطلع، كل ده بيدي له فرص أكثر من أي حد تاني للانتشار.

يعني، دول مبدئيًا اللي قدرت ألاحظهم في تجربة مصطفى،  
والحاجات دي تحديدًا هتلاقىها مركزة ومكثفة، وبأفخر أنواعها في  
"تسلم الأيادي". تركيبة معقدة، توزيعة قواري حادة، الكلمات بتشر  
عنف، عايز إيه تاني علشان تعمل أغنية "تكسر الدنيا".

تسلم الأيادي، بس ما تسلمش قوي يعني.

## اللعب في الدماغ



## فوازير أحمد فؤاد نجم

بعد حرب ثلاثة وسبعين بفترة بسيطة، أحمد فؤاد نجم، الله يرحمه، كتب عشر مقاطع قصيرة اسمها "الفوازير". كل مقطع/ فزرة كان شتمة مباشرة لحد من نجوم الفن والإعلام وقتها، من غير ما يذكر أسماء: أم كلثوم، عبد الحليم، صلاح جاهين، الأبنودي، محمد حسنين هيكل، موسى صبري، إحسان عبد القدوس، يوسف السباعي، بالإضافة لواحدة عن سيد مرعي، وواحدة أخيرة ما عرفتش هو يقصد بيها مين. والأشعار كاملة في آخر المقال.

أول مرة أقرأ القصائد كان سنة 1991، كانت في طبعة من أعماله الكاملة (له كذا تجميعية اسمها الأعمال الكاملة)، والطبعة دي كانت معمولة في سوريا، في دار نشر يمتلكها العماد: مصطفى طلاس وزير الدفاع السوري وقتها، اسمها دار طلاس للنشر. وكنت مستغرب إن القصائد منشورة بالألفاظ الكاملة.

وقتها قدرت أعرف نص المشتومين تقريبا، والأستاذ سيد كراوية عرفني على الباقيين، وفعلا كان شيء غريب علي إن الناس دي كانت بـ تتهاجم بالطريقة الصعبة دي، كنت فاكّر إن الرموز ما بـ تعضش فـ بعض. وبعيدا عن الزاوية للشخصية، النهارده بـ أقدر أفهم حاجات من اللي بتحصل حوالينا من خلال أشعار زي دي.

الواحد مش بيتعامل مع الكلام ده باعتباره رأي أبو النجوم الشخصي، وإنما كانت تعبير عن "المزاج الثوري" وقتها، اللي كان أغلبه يساريين، كانت فكرة الليبرالية مش مدرجة على خريطة العمل الوطني، وأغلب الماركسيين، وبعد شوية الناصريين، كانوا هم المعارضة للنظام على الأرض.

وتحس إن القصيدة دي، واللي شبهها، كان الأصل لفكرة التحفيل في الفيسبوك، إنك تستلم شخصية، وحبذا لو كانت شخصية عامة، وتقعّد قهيل عليها التراب، وتوجه لها أبشع الشتائم، وتقول عنها كلام يوجع.

علشان الشتيمة البشعة دي تعدي، يا ريت يكون دمك خفيف، وستايلك روش، وإيفيهاتك حراقة، زي ما يقول لأم كلثوم: "يا مرضعة قلاوون"، أو يقول لعبد الحليم: "ماليمو الشخلووعة الدلووعة"، أو يوصف يوسف السباعي يانه "جاهل عصامي!"

وعلشان تكون مؤثر وإنت بـ تنتقد خصومك، لازم توزع عليهم اتهاماتك ببساطة زي ما بتقول السلام عليكم بالظبط، مع إنها اتهامات تمس الشرف بكافة مستوياته، زي ما يتهم عبد الحليم يانه يهرب أموال ويدعي المرض، ويتهم الأبنودي بأنه بيسرح بنات! مع إن عبد الحليم كان مريض فعلاً لدرجة إنه مات بعدها بشوية صغيرين وهو عنده يدوب 48 سنة. ومع إن الأبنودي عمره ما كان شمال، مهما اختلفت مع أداؤه السياسي.

الغريب بقى إنك بتستخدم، وتكرس للمفاهيم اللي إنت بتحاربها، علشان شتيمتك تبقى أوجع، زي ما يقول عن إحسان عبد القدوس إنه "ابن أمه"، مع إنك المفروض تقدمي، وبتسعى لحقوق المرأة وكده، وأبسط حاجة يعني إنك ما تتعرضش للمواطن وأمه بالطريقة دي، بس عادي يعني مفيش مشكلة إنك تشتم حد بأمه، أو إنك توصم حد بالمثلية الجنسية، أو تعابر حد يانه كبير في السن، أو تقيل فـ الوزن، أو تستخدم حاجات شخصية، طول ما إنت شايف الحد اللي إنت عايز تشلفطه عدو لـ "الثورة".

اللي أعرفه إن أحمد فؤاد نجم تراجع عن معظم الشتائم دي، خصوصاً صلاح جاهين اللي كتب له قصيدة رثاء، كلها مديح، وقال كفاية إنه كان بيحلف بعرق الجبين، فإشارة لغتوة "يا أهلا بالمعارك" اللي كتبها جاهين لحليم، وكان بيقول فيها :

وحياة الدم الغالي

وحياة عرق الجبين.

علشان كده القصة مش مين شتم مين، القصة إزاي بنعالج  
اختلافاتنا وخصوماتنا، ودي حاجة محدش كثير يترجع عنها، بكل  
أسف.

أم كلثوم:

يا ولية، عيب اختشي

يا شبه إيد الهون

ده انتي اللي زيك مشي

يا مرضعة قلاوون

مدحتي عشرين ملك

وميت وزير ورئيس

مروان، وعبد الملك

والمفتري، وعتريس

بتغني بالزميلك؟



ولا انتي صوت إبليس

من أول المبتدأ

حقي نهاية الكون؟

عبد الحليم حافظ:

لما ليمو الشخلوعة الدلوعة الكتكوت

الليله هيتنهد ويغني ويموت

يشيلوه قال على لندن

علشان جده هناك

من بعد ما يتلايم

علي دخل الشباك

ويهرب أموالك

ويقولك أهواك

يا شعب يا متلوع

ع الهدمة وع القوت

صلاح جاهين:

شاعر بيتخن من بوزه

ممکن تخوف بيه عيالك

نازل يقزقر أزا أوزو

حتسك يميناك وشمالك

بقي مليونير، واللي يعوزه

يلقاه في إيده، عقبالك

وخلي بالك من زوزو

وخلي زوزو من بالك

الأبنودي:

مقاول وشاعر وبياع ملوحة

وتاجر غناوي وسمسار بنات

نعيمة وزكية وعطيات وتوحة

ومخبّر مودك على التقريرات

حضر من بلدهم، بمقطف ملوحة  
جبر واشتراله ثلاث تاكسيهات

محمد حسنين هيكل:

لأن الصراحة في بلدنا قليلة  
بفضل المباحث، وأدب الرموز  
جعلها اللثيم ابن بنت اللثيمة  
شعار يرمي تحته السموم كيف يعوز  
وبهدل أصول الصراحة العظيمة  
وخلا الندوب في الحقايق بروز  
وحرم وحلل  
وكثر وقلل  
وسمى القبيلة الذليلة حليلة  
وقال ع السكوت ع الهزيمة:  
يجوز؟

إحسان عبد القدوس:

ينسونة المتبعت

ما لقاش أب يلمه

إبن امه، بس امه

كانت اجدع من أمه

باع نفسه بخسارة

ما قابلش المعاييرجي

كان مالك أفكاره

واتعين تفكيرجي

والحاجة اللي تحير

طب إيه اللي اتغير

كان كاتب سرايرجي

واتحول شماسرجي

يوسف السباعي:

سكرتير عموم مصر

وافهم كلامي

تعدد مناصبه

ولا تنتهيش

وجيه بالوراثة

وجاهل عصامي

جمع جهل طایل

وايه؟ من مفيش

وكان أصله ظابط

وحول حرامي

ويكتب أدب

بس ما يتقريش

موسى صبري:  
يكون في عون الصحافة  
الله يكون في العون  
لَمَالِكَ يا دود القرافة  
يا رمة يا ملعون  
ينهش لحوم القرايس  
في الضلمة يا وطواط  
والكلمة عندك بضاعة  
أما الشرف مطاط  
بريئة منك بلدنا  
مسلمين واقباط  
ولا انت موسى ولا انت  
من كلاب فرعون

سيد مرعي:

اللورد بن اللورد بن اللورد

متأصل في الثروة

لا أوناسيس ولا فورد

حيطبق بسلامته

قوانين الاشتراكية

ويدافع من عشمه

عن صوت الحرية

وأهي كوسة علي بامية

علي قرع استامبوللي

بتفرع يا بلدنا

علي وش التسقية

مجهولة:

يتوب علي دي البلد

منك وأمثالك

ما عدش لينا جلد

علي سو أفعالك  
الفن للمعركة  
عبته في البلايص  
وصحافة المعركة  
في الكذب والتهجيص  
ومليت طريق الهرم  
يا ع.....، بالتع.....  
ما دام ما فيش للهرم  
صاحب، هنيا لك



## غريب في بيتي

شفت منظر جماهير الأهلي في الماتش الودي وهي مالية الاستاد في الكويت، ولا كأن الكوايتة هم اللي ضيوف!

المشهد ده حصل في السبعينات بحذافيره، وكان برضه في الكويت، بس كان المنتخب هو اللي بيلعب مش الأهلي، يومها جينا جون، إن لم تخوني الذاكرة جابه حسن شحاتة، فراح الجمهور المصري هتف: "قاعدين ليه؟ ما تقوموا تروحوا!"

العتاف ده كان معروف وقتها، ومعناه إن الماتش اتحسم خلاص، وإحنا هنكسب، فانتو قاعدين ليه؟ (في الاستاد يعني)، ما تقوموا تروحوا بيوتكم.

العتاف ده كان هيعمل أزمة مع الكويت وقتها على المستوى الرسمي، والخارجية الكويتية بعنت استفسار للخارجية المصرية،

فحواه: نروح فين؟ إحنا على أرضنا وفي بلدنا؟ إنتو اللي ضيوف إن كان بعثة المنتخب ولا الجماهير.

لكن الموضوع مش بس مع الدول الثانية، جوه مصر كمان. وفي سنة 1983، كان الدوري عليه منافسة شرسة من الأهلي والزمالك والمقاولين (المقاولين كسب في النهاية) بس في الأسابيع الأخيرة، وكل نقطة ليها ثمن، المقاولين كان رايح يلعب ماتش في المنيا. شركة "المقاولون العرب" طلعت أتوبيسات من كل حطة في الصعيد، بني سويف، المنيا، أسيوط، سوهاج، .... علشان عمال الشركة يروحوا يشجعوا الفريق.

ساعتها كان منظر يهلك من الضحك، للأسف مكنش فيه موبايلات، كان لازم يتصور، عمال "المقاولين"، لابسين تي شيرتات "المقاولين"، وراكبين أتوبيسات المقاولين، اللي لوها لون فائلة الفريق، وماسكين في أيديهم أعلام حمراء، وعمالين يهتفوا: "أهليسي، أهلي". بس المقاولين كسب وقتها، وكسب الدوري كمان.

بمناسبة المقاولين، كانت القوات المسلحة عاملة تقليد في التمانينيات، إنها تطلع كتية من العساكر، يروحوا الاستاد، يشجعوا أي فريق مصري يلعب في أي بطولة خارجية، سواء المنتخب أو الأندية، وكانوا حاجزين أوتوماتيك مش عارف كام ألف تذكرة، في كل مباراة.

فضل الموضوع ده لحد ما الأهلي كان هيلعب المقاولين برضه  
في بطولة أفريقيا للأندية أبطال الكؤوس، المقاولين بعنت التذاكر،  
فالجيش قال لهم: لو العساكر حضروا الماتش هيشجعوا الأهلي.

فرق القوات المسلحة نفسها حصل معاها كده، أنا ما حضرتش  
الستينيات، لكن أول فريق عسكري أشوفه في الدوري كان حرس  
الحدود (اللي لعب موسمين في الستينات باسم "السواحل"). الكلام  
ده كان موسم 2002/2003، ويشاء السميع العليم إن أول ماتش في  
الدوري للحرس قدام الأهلي.

القوات المسلحة طلعت الكتيبة اللي بتطلعها للفريق من ساعة  
ما كان في الدرجة الثانية، وفضلوا العساكر قاعدين عادي لحد ما  
محمد فضل جاب جون الأهلي، فقاموا هيصوا، والإدارة إدقم جزا.  
فيه بقى مدن تانية لطيفة جدا، بيروحوا يملوا الاستاد، ولو  
الأهلي كسب بيشجعوه، ولو فريقهم كسب بيشجعوه برضه،  
زي جماهير الإسكندرية وأغلب مدن الفلاحين، بعكس الصعيد اللي  
أغلبه أهلاوية متعصبين، باستثناء أسوان اللي بيشجعوا الزمالك لو  
لعب ضد أهاليهم.

طبعا الاستثناء من كل ده مدن القناة، بالذات الإسماعيلية  
وبورسعيد، ولاؤهم الأول والأخير لفرقهم، وده كلام من زمان  
قوي، لدرجة إني فشلت أعرف جذوره، وفكك من كلام التهجير  
والمهجن ده، دي حاجات لا ليها أصل ولا منطق.

كثير الأمثال على إنك تحس إحساس "غريب في بيتي"، ودي  
عبارة ليها معنيين حسب المخذوف: (يوجد) غريب في بيتي، ولا (أنا)  
غريب في بيتي، أو الاثنين مع بعض. بس أيا كان هو إحساس صعب  
جدا إنك تبقى قاعد فـ بيتك، وحد ييجي يقول لك: "قاعدين ليه؟  
ما تقوموا تروحوا"

## صدمة كمال عمار

في أوائل التسعينات، ولسبب ما، كان إعلام الدولة الرسمي كله، وبكامل طاقته، مسخر للهجوم على عبد الناصر، مش عارف ليه الحقيقة، ومش عارف، كمان، ليه مع نص التسعينات الهجوم ده فضل يخف يخف، لحد ما تحول لما يشبه التمجيد في 2005 وما بعدها.

فاكر كويس سنة 1992، وإزاي التحول الاحتفال بـ 23 يوليو لمنصات صواريخ ضد ناصر، إيشي رمضان عبد العظيم، إيشي محمد الحيوان (صحفي كان اسمه كده فعلا مش سخرية والله) إيشي محمد جلال كشك، وهلم جرا.

وقتها كان جرنان "المساء" لرئيس تحريره ورئيس مجلس إدارته، الأستاذ سمير رجب، بيخصص مربع في صدر الصفحة الأولى

لشاعر اسمه "كمال عمار"، يكتب أشعار في هجاء عبد الناصر،  
ومديح مبارك في نفس واحد، وفاكر مثلاً الحقة دي:

اللي عاجبني في مبارك إنه مش منهم

من اللي مسكوا البلد حبسوها في قمقم

وصدروها اليمن والكونغو وما بينهم

.....

كنت ساعتها في ثانوي، وناصرى، وبكُونْ خلية في مدرستا  
لسنادي الفكر الناصري اللي كان عامله حمدين صباحي في  
الجامعات، وكانت فكرتي إني ليه ما نعملش نوادي شبيهة في المدارس،  
وبالفعل كونت خلية من 5 طلاب ومدرس ألعاب، كان معانا بس  
كان بيحب مبارك علشان شايفه امتداد عبد الناصر، وكان  
بيألف مسرحيات بالمعنى ده!

المهم، كنت طبعا بـ اكره كمال عمار، وشايفه شاعر أرزقي  
تعبان، بيقبض من سمير رجب علشان يشوه صورة الزعيم الخالد  
أبو خالد، قائد الثورة العربية، اللي أفكاره هي طريق أمتنا الوحيد  
للخلاص، ساعتها كنت باتعامل مع "الثورة" باعتبارها مسألة وقت،  
لأنها مسألة مبدأ.

المهم، وقع ف إيدي كتاب في مكتبة المدرسة، طبعته الدولة، بس  
في زمن تاني، في أكتوبر 1970، الكتاب عبارة عن تجميعة لقصائد  
الرثاء اللي اتكتبت في عبد الناصر أول ما اتوفى.

قعدت أقرأ أسامي الشعرا: نزار قباني، أمل دنقل، أحمد عبد  
المعطي حجازي، وفلان وفلان وفلان وكمال عمار!!!

ربك والحق، أول ما شفت اسم الراحل جالي استبحس، ما كنتش  
خدت ع الصدمات دي، كان بالنسبة لي الناس فريقين: فريق "مع"،  
وفريق "ضد"، واللي "مع" خلاص ما ينفعش يبقى "ضد"، واللي  
"ضد" ما ينفعش يبقى "مع".

أول قصيدة قريتها طبعًا كانت قصيدة كمال عمار، ولسه فاكر  
كويس كام بيت منها يقولوا إيه:

مَنْ بعدك يحكى للفقراء

عن يوم لا يعرف طعمًا للحزن

عن أرض ما فيها

غير يكون إجابة كن

مَنْ بعدك يا عبد الناصر؟

يا نهار أزرق، هو فيه كده يا جدعان، يعني ينفع تتعامل مع  
الراحل باعتباره إله، وبعدين تتعامل معاه باعتباره سبب خراب البلد؟

صدمة كمال عمار خلّفتني أتابع حاجتين، الأولى هي التحولات العنيفة دي، يعني مثلاً من ضمن الشعرا اللي كانوا كاتبين رثاء برضه، صالح جودت، اللي تحول لراس حربة في الهجوم على عبد الناصر بعد وفاته بأربع سنين، أربع سنين فقط لا غير.

بدأت أتعرف كمان على تحولات عادل حسين ولطفي الخولي، وأبص بعين جديدة لتحولات مصطفى محمود، وبدأت أعود لفكرة إنك ممكن تبقى مع حاجة من كل قلبك، وبعدين تتغير وتبقى ضدها من كل قلبك، ومحدث يقدر يحط قاعدة للتغيرات دي، ومحدث يقدر يجزم أهّي تغير كان صادق، وأهّي كان بسبب مكاسب، وأهّي كان مجرد انتقام!

الحاجة الثانية اللي تابعتها هي كمال عمار نفسه، اللي اكتشفت إنه واحد من الناس اللي لعبت أدوار مهمة في الحركة الأدبية المصرية، والعربية، وياما اكتشف ناس، وأسس مطبوعات جوه مصر وبراهها، ومرة راح قطر عمل صحيفة "الراية" القطرية ورجع بسرعة قبل ما يعمل القرشنيات، علشان "مصر وحشته".

تقديري إن الراحل كان رومانتيكي، بيحب بعنف، وبيكره بعنف (وتقدر تقول بـ "عبط")، وكان هليهلي وبينفعل من أقل حاجة ويستجيب لانهجالاته من غير أي حساب.



بعد ما خلصت الهوجة، ما بقاش حد ينشر له، وركنوه تمام، ما  
كلفوش خاطرهم حتى ينشروا له ديوان لقصايدده اللي بجد، واتنسى  
تمامًا تمامًا، اتنسى للدرجة إنه جاله زهايمر، وخرج من بيتهم مرة سنة  
2005، وتاه، ولقوه بعد أسبوع غرقان في ترعة الخطاطبة.

ربنا يرحمه

ربنا يرحم الجميع

## حلمنتيشي

فيه ناس بتستخدم كلمة "حلمنتيشي" بمعنى: فكاهي أو كوميدي أو كليشكان أو بزرميط، أو حاجة بسيطة كده على قدها، بس مش هو ده معناها اللي اتعملناه.

حسين شفيق المصري، هو اللي اخترع المصطلح، اللي ليه معنى محدد، هو لون من الشعر ظهر من حوالي 100 سنة، وله نجوم ومعلمين وأسطوات وتلاميذ، وناس يا دوب عملوا محاولات، وسبب التسمية إن فيه فرقة كانت بتقول أشعار شفيق المصري، كان اسمها "حلمنتيش".

إيه معناها بقي ومين حسين شفيق المصري؟

ده شعر بيحافظ على الوزن والقافية بالشكل العمودي التقليدي جداً، لكن بيستخدم، أحياناً، مفردات عامية، أو تركيبات

عامية، من غير الإخلال بسلامة والصرف والعروض والقوافي. من هنا بستيحي الفكاهة، وكل ما الشاعر حافظ أكثر على القواعد، يبقى حلمنتيشي متمكن أكثر.

شفيق المصري ده واحد من الصعاليك الكبار، اتولد أواخر القرن الـ 19، واتوفى 1948، واشتغل في كل حاجة وأي حاجة، وكان شاعر معروف في بدايات القرن العشرين، وله شعر ما يفرقش كثير عن أحمد شوقي وحافظ إبراهيم والبشرية دي.

ما تعرفش إزاي طلعت في دماغه، يعمل الشعر بالشكل ده، مثلاً:

لزينب دكان بحارة منجد  
تلوح بها أقفاص عيش مقدد  
فمالي أراي وابن عمي مصطفى  
مق أدن منها ينأ عنها ويبعد  
يقول وقد ألقى الرغبة وسابني  
ألست ترى بعلا عويس بن أحمد  
فأقبل زوج الست يلعن أمها  
ويسعى إلينا بالمداس المهربد

كتب شفيق المصري حاجات كثير بالشكل ده، وأغلبها تقليد (بيسموه معارضة) للقصائد العربية المشهورة، خصوصاً المعلقات، وسماها مشعلقات شفيق المصري، وفيه حاجات لطيفة جداً، زي القصيدة اللي كتبها معارضة لقصيدة: مالي فتنت بلحظك الفتاك، واللي كان يقول فيها: إخيه ع البقف الذي رباك

بس قرابة الحاجات دي دلوقتي صعبة لأنها مركبة، لازم تعرف الأول اللغة الأصلية المكتوب بيها، علشان تعرف فين المفارقة.

بعد المصري ظهر ناس مش كثير عملوا الحكاية دي، منهم عبد الوارث عسر الممثل، وأبو بثينة الشاعر، وكذا حد ما عرفناش اسمه، لكن عرفنا الشعر اللي كتبوه، لكن من أظرف وأجود الناس اللي كتبت الشعر الحلمنتيشي شاعر راحل من أسيوط هو محمود شوقي أبو ناجي.

الراجل ده قابلته في أسيوط، في طفولتي وبدايات تعرفي على الشعر أيام إعدادي وثانوي، وكان من الناس اللي اتعلمت منهم أساسيات كتابة الشعر العمودي، وإزاي تحافظ على وزنك وقافيتك ونحوك وصرفك في القصائد، وياما رحنا بيته في مركز أبو تيج، وكان بشكل عام من أخف الناس دما.

أبو ناجي كان بيراسل تقريباً كل المجلات الثقافية العربية، ويعتلمهم الشعر الحلمنتيشي، وكثير مجلات نشرت له، ولما كان بيروح ندوة أو أمسية كان نجم في أقاليم مصر كلها.

من القصائد المشهورة لأبو ناجي، قصيدة اسمها "بيجماليون"، وكان الشاعر سعد عبد الرحمن (رئيس هيئة قصور الثقافة سابقاً) كاتب قصيدة عن أسطورة "بيجماليون"، الفنان اللي بى تمثال واتعلق بيه وبعدين هذه.

أبو ناجي عمل معارضة للقصيدة، وكانت مسخرة، اللي فاكرو منها:

هردومة اللحم واغشي والمرق

سال اللعاب لها والقلب ينفق

كأنني جردل مخلوعة يده

مفصص القعر مرمي ومندل

أو كاليهيم على البرسيم وهو على

جوع مقيم فلم يعبأ بمن زعقوا

المشكلة اللي ما خلش اللون ده يستمر، هي إن الشعر العمودي نفسه اختفى، وما بقاش حد يكتبه ولا يقراه ولا يتذوقه، فبالتالي السخرية نفسها مش باينة، لكن تقدر تعتبر عمرو قطامش امتداد للون ده بمعنى ما، خصوصاً قصيدة "شاب سيس" اللي اشتهر بيها أول ما طلع، بس كمان هو ما استمرش، يعني ظهر زي إيفيه، وما عادش ينفع تسمعه تاني

## في صحة التاريخ والتأريخ

يمكن، بعد خمسين سنة مثلاً، ييجي باحث أو حد مهتم بتاريخ الفن، فيلاقي فيلم اسمه "365 يوم سعادة"، بطولة نجم من نجوم الصف الأول في مصر (أحمد عز)، ويلاقي إن مخرج الفيلم لبناني (سعيد الماروق). الفيلم إنتاج 2011

يمكن طبعاً يطلع من القصة دي باستنتاجات كثير، منها مثلاً إن السينما المصرية كانت بتستعين عادي بمخرجين من دول عربية ثانية، ويضرب مثال بده، أو إن ثقافة الفيديو كليب انتشرت لدرجة الاستعانة بمخرج كليات لإخراج فيلم كبير، أو "إن الحراك السياسي الذي واكب ثورة يناير خلق أفقاً مصرياً منفتحاً على المشهد العربي" (جامدة دي) أو غيرها من التفسيرات والدلالات والاستباطات الشبيهة.

علشان كده، وعلشان خاطر عيون التاريخ والتاريخ، خلىنا نقول: ليه الفيلم ده ما أخرجوش مخرج مصري.

بداية الحكاية سنة 2004، لما عادل إمام عمل فيلم "عريس من جهة أمنية"، إنتاج عصام إمام (أخو عادل) ومونتاج ماجد مجدي.

ماجد مجدي صاحب عصام إمام، وف قعدة كده، اتفقوا إفهم يدوروا على فكرة تناسب عادل إمام (كوميدي لايت بطله جراند)، ويعرضوها على عادل بحيث يخرجها ماجد نفسه.

روح ماجد بيتهم، ورجع بعد شوية، بـ فكرة فيلم اسمه "365 يوم سعادة" بيحكى عن واحد مقضيها هلس وبيتجوز عري، ويخلص من المزة بحكاية إنه مريض .... (إلى آخر الفيلم اللي حضرتك شفته بس بطولة أحمد عز)

عصام قال لـ ماجد: تمام، فكرة عظيمة، نكلم بقى يوسف معاطي (السيناريست المفضل لعادل إمام) يبدأ يكتب في السيناريو، كلموا معاطي، الفكرة كيت كيت كيت، تمام تمام.

في هذه الأثناء كان عادل إمام اتفق فعلاً على فيلم "السفارة في العمارة" للسنه اللي بعدها، وبرضه منتجه ماجد مجدي، بعدها جود نيوز تعاقدت مع عادل إمام، ويعقوبيان بقى والإنتاج الضخم بتاع آل أديب، وهكذا راحت فكرة إن عادل إمام يعمل الفيلم ده في الوباء.

راح ماجد من ناحية ثانية يحاول يعمل الفيلم مع حد ثاني، ما أمكنش، يلاقي نجم زي شريف منير، يوافق ع الفكرة، ما يبقاش فيه منتج متحمس، يلاقي المنتج ما يلاقيش يكون منير انشغل.

وف يوم، كان ماجد فـ زيارة لمنتج صاحبه، لقي ع المكتب كوم ورق مكتوب عليه: مسلسل "365 يوم سعادة" قصة وسيناريو وحوار يوسف معاطي! يا دي الحوسة! راح طالع ثاني يوم ع الشهر العقاري مسجل المعالجة اللي كان كتبها أيام عصام إمام، وقدمها للرقابة، وخذ عليها موافقة.

طبعاََ المسلسل ما اتعملش بعد ما المنتج عرف اللي فيها، لكن طبعاََ معاطي كان عامل منه نسخة مسلسل، ونسخة فيلم، ومش بعيد يكون عمل منه نسخة كوميكس، ونسخة ثاني برنامج توك شو، عادي.

شوية، وماجد بـ يعمل مونتاج فيلم "الثلاثة يشتغلونها"، لقي علي إدريس، مخرج الفيلم، بيقول له: عايزين نخلص الفيلم ده، علشان ندخل بعده على فيلم ثاني لـ أحمد عز. فالظاهر إنتاج محمد ياسين (غير محمد ياسين المخرج) بس فالحقيقة إنتاج نبيل خلف (أبو شادي خلف اللي عمل دور الدكتور صاحب أحمد عز)، والمنتج المنفذ عمرو الصيفي.

فيلم إيه يا فنان؟



فيلم اسمه "365 يوم سعادة" مع يوسف معاطي.

أوبيا

ماجد راح راصص له الحكاية، فـ اعتذر إدريس عن العمل،  
كلموا مخرج ثاني، كان ماجد نشر القصة فـ الوسط، المخرج الثاني  
رفض، والثالث رفض، والعاشر رفض، كل مخرجين مصر رفضوا  
يخرجوا الفيلم ده، لأنه عيب طبعًا، وهـ يبقى فيه دوشة وفضيحة،  
وعلى إيه؟

فين وفين راحوا لبنان، جابوا مخرج يعمل الفيلم ده، بس بعد ما  
وافق المخرج، وبدأ التصوير، كان فيه قرار بـ وقف تصوير الفيلم،  
لأن ماجد اشتكى في النقابة.

ممدوح الليشي الله يرحمه، جمع الأطراف المتنازعة، وقرروا يبدؤوا  
تصوير، بشرط إن اسم ماجد مجدي يكتب ع الفيلم باعتباره صاحب  
القصة، وقد كان. هتلاقي في تترات الفيلم، فكرة: فلان الفلاني.

ولأن السينمات بتبدأ أسبوعها يوم الأربعاء، يعني العرض الأول  
بيكون في حفلة تسعة مساء الثلاثاء. ف بعد ما خلصوا مونتاج  
الفيلم قرروا يعرضوه في أجازة نص السنة، واختاروا آخر ثلاث في  
شهر يناير، وده كان موافق 25 يناير 2011. وحضرتك طبعًا متخيل  
مصير الفيلم.

بس يا سيدي، آدي الحكاية من طقطق لسلامو عليكم، ولذلك  
أنصح الباحث اللي هـ ييجي بعد خمسين سنة إنه ما يركزش مع  
مخرج الفيلم اللبثاني، ويركز مع العلاقة المالية بين نبيل خلف ومحمد  
ياسين، وهـ يعمل شغل جامد تين.  
ياللا، إن الله حلیم ستار.

## الفهرس

### ابن موت حكاياتُ الراحلين مبكرًا

- 7 أبو الطيب المتني.. عيد بأي حالٍ عُذتَ يا عيد
- 11 أبو القاسم الشابي.. إذا الشعب
- 15 أحمد سالم هنا القاهرة .. هنا المغامرة
- 19 إسماعيل أدهم.. لماذا أنا ملحد؟
- 22 إسماعيل الحبروك.. كل شيء راح وانقضى .. بسرعة
- 26 ثلاثة أسمهان
- 30 أمل دنقل .. الله .. الوطن .. لا تصالح
- 34 أنور عبد الوهاب.. زمن الفن الجميل
- 38 رمضان البرنس.. عودي
- 43 رضا.. جينا جون يا رضا
- 47 سيد يا درويش.. يا نابغةٍ ليه تموت مسموم

- 51 صالح الشرنوبى.. اللا منتمى
- 55 طرفة بن العبد.. اللي منى مزعلينى
- 59 عصام عبد الله.. فى قلب الليل
- 63 على مهدي.. فوق الشوك
- 67 عماد عبد الحليم.. الضباب
- 71 عمر فتحى.. على على على
- 74 كاميليا.. الواقع فاق الخيال
- 78 محمد عبد الوهاب.. الصدمة
- 82 مصطفى كامل.. لو لم أكن مصرياً
- 86 هاشم الرفاعى.. سرقوه الإخوان
- 90 يحيى الطاهر عبد الله.. الطوق والإسورة

## كلام أغاني الحب وأشياء أخرى

- 97 فى البداية
- 100 الأنودى .. المغنواي

108 اسمها "عدوية"

113 على "اسم مصر"

120 سبع حسنات في ميزان .. فتحي قورة

129 حزن يا بقال .. ذهاب بلا عودة

140 فين الضمير يا جدعان؟

148 تسلم الأيادي .. بس ما تسلمش قوي

### اللعب في الدماغ

157 فوازير أحمد فؤاد نجم

169 غريب في بيتي

173 صدمة كمال عمار

178 حلمنتيشي

182 في صحة التاريخ والتاريخ

